

Revalesen-Hufo Hu'ne Joni Kre'nea Avontafere

Jisasi'a fraki'nea ke Joninte erinte'ama hu'nea naneke

¹ Anumzamo'a eri'za vahe'araminte kofta huno fore'ma haniazana, oku'a me'nea ke Jisasi'a ankeru ne'a amino huntengeno, eri'za ne'are Joninte emeri ama hu'ne. ² Joni'a Anumzamofonkea huama nehuno, Jisasi agenkene maka'zama ke'nea zamofu kea huama hu'ne. ³ Ama kasnampa kema hamprinaza vahe'ene, antahi'naza vahe'ene, ana kema amage'ma antenaza vahe'mo'za asomu erigahaze. Na'ankure anazama fore'ma hania knamo'a, hagu kofta nehie.

Seveni'a mono nonte mani'naza vahe'mokizmi krezami'nea naneke

⁴ Nagra Joni'na, ama naneke Esia kaziga 7ni'a mono nonte naga'motarega avona kreneramue. Hagi korapa mani'neni, menima mani'neankino, henkama mani'nia Anumzamo, Agra'a asuragi'zane, rimpa fruzana tamina, fru hutma manigahaze. Hagi 7ni'a Avamutamima Anumzamofu kini tramofu avugama nemanizamo'za, zamaganena zamasu ragiramante'za, tamazeri fru hanigeta, fru hutma nemanisageno, ⁵ Jisas Kraisi fatgo huno, Anumzamofu ke'a huama nehimo, Agra'a fri'naza vahepintira ugagota huno ese oti'nemo, maka mopafi vahe'mokizmi kini

vahe kegava huzmante'nea ne'manin'eankino, Agra kumitifima mani'nonkeno, avesiranteno korama'areti mizaseno katufe tantenegu agi'a erisaga hanune. ⁶ Agra'a vahe tazeri retro huneranteno, agra tavreno Anumzamofu eri'za erisuna pristi vahe retro hurante'neankino, Agrake'za maka kna ra agi'a e'nerino hanavea erino, manivava hugahie. Tamage. ⁷ ***Keho, Agra hampompi ne-eankino,*** (Dan 7:13) maka vahe'mo'za negesageno, keka zafare'ma krugruma renaza vahe'mo'zanena negesageno, maka ama mopafi vahe'mo'za zavi krafa hugahaze. Hanki e'ina hu'zana fore hugahie. Tamage. ⁸ ***Nagrani'a ese agafahu manina (Alfa), vagare mani'noe (Omega). Korapa mani'nena, menina mani'noankina, henka egahue*** huno hanavenentake Ra Anumzamo'a hu'ne.

Joni'a ava'nagna zampi Jisasina ke'nea naneke

⁹ Nagra Joni'na neramafu'na Anumzamofu kumaku'ma knama enerita Jisasinte'ma kazigazi huta magoka nevumo'na, navre'za ti amunompi Patmosie nehaza mopa, me'neri ome nante'naze. Na'ankure Anumzamofu kereku'ene, Jisasi agenkema huama'ma nehua zanku anara hu'naze. ¹⁰ Hanki Ramofu knazupa, nagra avamupi mani'ne'na nentahugenon, namefigatira mago agerumo'a ra ufereaza huno anage hu'ne, ¹¹ ***Amama kana zantamina avontafe krenka, 7ni'a kumate me'nea mono nontaminte atregeno vino. Efesasima, Smenama, Pegamamima, Taitariama, Sadisima, Fildafiamu, Ledosiamu hunka krezamio.***

¹² Anagama huno hige'na, rukrehe hu'na kema hia vahe kenaku'ma huana, 7ni'a tavi rekru hunte'naza azota golire tro hunte'nea me'negen ke'noe. ¹³ Ana lamu tavimofu amu'nompina, Vahe'mofu Mofavregna ne'mo, efeke za'za kukena antaninegeno agia ruhananegen, golire tro hunte'naza nofinu afumpinti rutahera higeno, asoparega kreramino vu'nege'na ke'noe. ¹⁴ Hagi Agri asenimo'ene azokamo'a efenentake huno efeke hampokna higeno, avurgamo'a teve anefakna hu'negen ke'noe. ¹⁵ Ana Ne'mofu agamo'a brasima tevefima krefizo hazageno, masanentake nehiankna nehigeno, agerumo'a rama'a timofu agasasa kemo'ma hiaza hu'ne. ¹⁶ Ana ne'mo'a azantmaga 7ni'a hanafi azeri'negen, tare kaziga asane kazimo agipintira atiramino egeno, Agri avugosamo'a zagemo remsa hiankna huno hanavenentake huno remsa hu'ne.

¹⁷ Nagrama ana ne'ma nege'na, agafi traka hu'na fri vahekna hugeno, tamaga azanu nagofetu nenteno anage hu'ne, **Korera kagra osuo, Nagrami'a ese agafahu mani'na, vagarera mani'noe.** ¹⁸ Kasefa hu'na mani'nomona ko frite'na, oti'na mani'noanki, keho, henka'a ofri'na manivava hugahue. Fri'zane, fri vahe'mofu kumate ki nofira Nagra azeri'noe. ¹⁹ E'ina hu'negu maka'zama menima kana zane, menima me'neazane, henkama fore'ma haniazanena avontafepi krento. ²⁰ Kagrama 7ni'a hanafi'ma tamaga nazampima me'negenka negenka, golire tavima rekru hunte azotama ke'nanana oku'a agu'agesamo'a amanahu hu'ne, 7ni'a

ofuna, 7ni'a mono no kumate ankeru vahetami ke'nane, tavi'ma rekru hunte azotama, golire tro huntenehenka 7ni'a ke'nanana, 7ni'a mono nontami me'nehenka ke'nane huno nasami'ne.

2

Efesasi kumate nemaniza mono naga'mofo krezami'nea naneke

¹ Efesasi kumate mono naga'mokizmi, ankeromofona amanage hunka kremio, Nagra 7ni'a hanafira nazantamaga azenerina, 7ni'a tavi'ma rekru hunte golire azotaramimofo amu'nompi vano nehumo'na, nehuanki antahiho.

² Hanavetinka eri'zama e'nerinka, maragu'zama netinka, maka knazama e'nerinka, kazigazima hunka nevunka, havi zamavu'zmava nehaza vahe'enema tragotenka omaninka, havige hu'za aposol vahe mani'none nehaza vahera refko huzmantenka negenka, havige nehaze hunkama nehanazana, Nagra ke'na antahi'na hu'noe. ³ Nagri nagireku'ma hu'za knama kamizana, kagra akohenka mani'nenka, ana knazana enerinka, kavesragura osunka kazigazi hunka knazana eri'nane. ⁴ Hianagi kagrira anage hu'na hugantegahue! Kagrama koma navesi nanteneankna hunka menina, navesi nonantane.

⁵ E'ina hu'negu kagrama trakama hu'nante kagesa nentahinka, ese'ma kagu'a rukrehe nehunka hu'nana kavukva hunka, kagu'a rukrehe huo. Anama osananke'na, e'na tavika'ama me'neretira emeri atregahue. ⁶ Hu'neanagi kagra amanahu nehane, Nikolasi avu'ava'ma nevaririza vahe'mofo zamavu'zmavara

kavesra hu'zmante'nane. Nagranena navesra hunezmantoa zamavu'zmava osu'nane. ⁷ Izano agesama me'nenimo'a, Avamumo'ma mono nagate'ma huamama nehia kea antahino, iza'o ha'ma ageteresimofona, Nagra atresugeno, monafinka Anumzamofa hozafi me'nea asimu eri zafa raga negahie.

Smena kumate nemaniza mono naga'mofo krezami'nea naneke

⁸ Hagi Smena kumate mani'naza mono naga'mokizmi ankeromofona amanage hunka krezamio, Nagra'a ese agafahu mani'na, vagare mani'nenana, frite'na otina mani'nomona, anage nehue,

⁹ Nama'agna kazeri haviza nehazageno, kamunte omne'neana Nagra antahi'noe. Hianagi kagra tusia feno vahe mani'nane, zamagrama Jiu vahe mani'none nehazanagi, zamagra Jiu va-hera omani'naze. Hianagi zamagra Sata naga mani'naze. ¹⁰ Hanki ko, kagrama knazampi ufresnana knamo'a kofta nehianki korera osuo. Sata'a hanige'za mago'a nagatamia zamavare'za kina hunezmante'za, rerahahe'za kesageta 10ni'a gnamofo agu'afi knazana erigahazanki, kazigazi huta nevuta ome frisagena, Nagra asimu erino mani asimura tamamigahue. ¹¹ Izano agesama me'nenigeno netahisimo'a, Avamu'mo'ma mono nagate'ma huama'ma nehia kea antahise hino, Iza'o ha'ma agateresimofona, nampa 2 fri'zamo'a azeri havizana osugahie.

Pegamam kumate nemaniza mono nagamofo krezami'nea naneke

¹² Hagi Pegamam kumate nemaniza mono naga'mokizmi ankeromofona amanage hunka krezamio, tarega kaziga asanenea kazima eri'nea ne'mo'a amanage nehie.

¹³ Nagra antahi'noe, Sata'ma kini tra anteno mani'nea kumate mani'nenka, Nagri nagima azeri hanavemati'nanana, Sata'ma mani'nere'ma mani'nankeno, Nagri naneke huama nehia ne'ma, Antipasina tamagri amu'nompinti avare'za ahe'naze. Ana hazanagi tamagra Nagrite'ma tamamentintima hu'naza zana otretfa hu'naze.

¹⁴ Hianagi Nagra osia zanku kea kagrikura huzahue, na'ankure mago'amo'za Baramu'ma rempima Barakima humino, Israeli vahe'ma kumi hihogu zamazeri trakama hukema huno, havi anumzante Kresramana vunte'naza ne'za nene'za, monko avu'avazama hihogu'ma hu'neazana kagra antahi'nane.

¹⁵ Anahukna hu'za Nikolasi'ma rempima hurami'nea kea amu'nontamifina mago'amo'za azeri'naze.

¹⁶ E'ina hu'nagu tamagu'a rukrehehiho, anama osanage'na ame hu'na e'na, nagipima asane kazima me'nea kazinu, eme ha' huzmantegahue.

¹⁷ Izano agesama me'nenimo'a Avamumoma mono nagamofo nesamia naneke antahise hino. Ha'ma agateresimofona, framaki'nea mana ne'za mago'a nemina, magora efeke have nemina, agi'a ana havere krentenugeno, rumo'a ana agia ontahigahianki, ana havema erisimoke, ana agia antahigahie.

Taiataria kumate nemaniza mono naga'mofo krezami'nea naneke

18 Taiataira kumate nemaniza mono naga'mokizmi ankeromofona amanage hunka krezamio, Anumzamofa mofavremofona avurgamo'a teve anefakna nehigeno, agamo'a pehe huno bronzi havegna huno marave marave hu'nemo'a anage hu'ne.

19 Nagra kavukvama hanana antahi'na ke'na hu'noe. Kagra kavesinenantenka, vahe'mokizmia kavese nezmantenka, kamentinti nehunka, eri'zama e'nerinka knazama ne-egenka kazigazi nehunka, ese knama kamentintima hu'nana zana, menima hana kamentintimo'a agatereno so'e zantfa hu'ne.

20 Hianagi Nagra anage hu'na hanaveti'na keaga hugantegahue. Jesebelina kasnampa a' mani'noe nehia ara atrankeno, kagrane mani'nenka, kazokazo eri'za vaheni'a rempi hunezamino, zamavreno havi kante nevig'e'za, monko avu'ava zana nehu'za, havi anumzante kresramna vunte'nea ne'zana ne'naze. 21 Nagra mago'a knaza ami'na, monko avu'ava'ma nehiazana agu'a rukrehe hanie huanagi, agra agu'a rukrehera osu'ne. 22 Keho, Nagra kri ami'nugeno, kri tafete masegahie. Agranema monko avu'avazama nehaza vahe'mo'za, anama nehaza zanku'ma zamagu'ama rukrehema osnazana, rama'a knazampi ana a'ene ufregahaze. 23 Nagra ana a'mofoma amage'ma nentaza vahera zamahe fri'nena, maka mono vahe'mo'za ke'za antahi'zama hanazana, maka vahe'mofo antahi'zane, zamagu'zmagesa nege hu'za nehanage'na, magoke magokemozama zamavu'zmavama

hanare, mizana zamitere hugahue. ²⁴ Hanki mago'a Taiataria mani'nazamota Jesebelima rempi hurami'nea kea amagera nontetma, rempima hurami'nea kea azenoritma, Satana oku'a antahintahia nontahitma, zamagrama hu'naza zana osu'nazanki'na, Nagra mago'a knazana ontamigahue. ²⁵ Ana hu'negu nazano menima azeri'nana zana azeri hanavetinege'na, Nagra a'neni. ²⁶ Iza'o ha'ma agatenereno, Nagri navu'nava huno vagare knare'ma vanimofona, anamofona Nagra hanavea amisugeno, rama'a vahe kegava krizmantegahie. ²⁷ Ana nehuno agra kini vahe'mo'ma e'neria aeni azotareti, mopa kavoramima rufuzafu'peankna huno vahetamina kegava hugahie. Nagrama Nenfantegatima vahe'ma kegava hu hanavema, eri'noankna hanave erigahie. ²⁸ Ana nehanige'na Nagra nanterama remsa nehia ofuna amigahue. ²⁹ Iza'o agesama me'nenigeno nentahisimo'a, Avamu'mo'ma mono nagate'ma huamama nehiana antahise hino.

3

Sadisi kumate nemaniza mono nagamofo krezami'nea naneke

¹ Sadisi kumate mono naga'mokizmi ankeromofona amanage hunka kremio, Nagra Anumzamofu 7ni'a Avamura nazampina eri'neni, 7ni'a ofuna eri'nomo'na, ke'ma hanuana antahiho. Kagrama nehana kavukvara antahi'na ke'na hu'noe. Maka vahe'mo'za kagra kasefa hunka mani'nane hu'za nehazanagi, kagra ko fri'nane. ² Hanki otinka, kagripima fri

vagaregeno'ma osiazama me'neazamo'ma fri'zama nehiana, azeri hanavetio. Na'ankure kagri'ma kagoana, Nagri Anumzamofu avurera, fatgo kavukvara nosane. ³ Ana hu'negu ko'ma rempi hugamizagenka, nentahinka eri'nana kea azeri kona nehunka, kagu'a rukrehuo. E'ina hu'negu, kagrama otinka, kagu'ama rukrehe osnanke'na, omegahie hunka kagesa ontahi'nana knafi, kumazafa vahe'mo'za neazankna hu'na egahue. ⁴ Hianagi osi'a naga Sadisi kumate mani'namo'za, havi zamavuzmava osu'za kukena zamia eri pehana osu'nazanki'za, zamagra efeke kukena nehu'za, Negrane kana vugahaze. Na'ankure zamagra Negrane vuga hu'naze. ⁵ Iza'o ha'ma agteresimo'a zamagrikna huno efeke za'za kukena nehanige'na, asimuma erino mani avontafepintira, agi'a reohananevahue. Nenfane, ankeru vahe'amofu znavurera agi'a huama vahue. ⁶ Iza'o agesama me'nenigeno nentahisimo'a, Avamu'mo'ma mono nagate'ma huamama nehia kea, antahise hino.

Fildelfia kumate nemaniza mono nagamofu krezmi'nea naneke

⁷ Fildelfia kumate nemaniza mono naga'mokizmi ankeromofona amanage hunka kremio, Agra ruotge huno, tamage Ne'mo, Deviti kinofi eri'neankino, kafama anagisiana, magomo'a eri onkisigeno, erigisiana mago'mo'a eri anagigara osu'nemo anage nehie.

⁸ Nagra kavukvaka'a kage'na antahi'na hu'noe, ko, kavuga kahana anaginte'noankino, mago vahe'mo'a erionkigahie. Na'ankure kagra osi'a

hanaveka'a me'negenka, nanekeni'a amagenen-tenka, nagi'a eri frara oki'nane. ⁹ Ko, Sata mono naga'mo'za hu'za, Jiu vahe mani'none nehu'za havige nehaza vahera, Nagra zamatufesuge'za e'za, tamagri tamagafi eme zamarenare'za, tamage Nagra tamavesineramantoe hu'za, zamagra ke'za antahi'za hugahaze. ¹⁰ Na'ankure kagra kazigazi hunka, Nagri kea amage ante'nane. Ana hu'nanku ama mopafi miko vahe'mo'zama rehezampima ufresaza knafina, katresugenka rehezampina kagra uofregahane. ¹¹ Nagra ame hu'na egahuanki, ko'ma eri'nana zana azeri kona huo, ana'ma osnanke'za rumo'za kini fetorika'a erigahaze. ¹² Iza'o ha'ma azeri agateresimofona, Anumzanimofa ra mono nompí, no azeri hanaveti anumza zafa tro hunente'na, agrira atrenugeno atinoramina, Anumzanimofa agine, kasefa Jerusalemi ku'ma monafinti, Anumzanimofontega atreno eraminia kuma'mofo agi'a krentente'na, Nagra kasefa naginena krentegahue. ¹³ Iza'o agesama me'nenigeno'ma nentahisimo'a, Avamu'mo'ma mono nagate'ma huama'ma nehi-ankea antahise hino.

Laodisia kumate nemaniza mono nagamofo krezami'nea naneke

¹⁴ Laodisia kumate nemaniza mono naga'mokizmi ankeromofona amanage hunka kremio, Nagra tamage ne'mo'na, maka kea avariri fatgo nehu'na, fatgo hu'na maka kea huama nehumo'na, Nagra maka zama Anumzamo'ma, ese agafereti'ma tro'ma hu'nea zamofa agafa'a mani'nomo'na, ama naneke atrogeno kagritega e-e.

¹⁵ Mika tamavutmava hunazana ke'na antahina hu'noe. Tamagra amuho osutma, zasira osutma hunazanagi, Nagri'ma nave'ma nesiana, amuhoma hanamotma, amuho hinkeno, zasima hanamota, zasi hiho. ¹⁶ Amuhone zasi'enena osutma, amunonte mani'nagu, Nagra nagipintira amu'ati tamatregahue. ¹⁷ Na'ankure kagra anage hunka nehane, rama'aza ante'nenana, tusi'a fenone vahe mani'noe hunka nehunka, mago'zankura upara osu'noe hunka nehananagi, kagrama havizantfama hunka, kasunku hugantega kante mani'nenka, kamunte omaneno, kavu asu higenka, kavufa kavapa mani'nanana kagra nonkane. ¹⁸ Nagrama kasamisua, tevefima kreno eri agruma hu'nea golia Nagripinti mizasetenka, feno vahera nemaninka, efeke za'za kukena miza senka kukena nehugeno, kagaze kavufamo'a amatera nosina, avure fre masave Nagripinti miza senka, fretenka kavua ke so'e huo. ¹⁹ Nagrama navesizmantoa naga'mofona hanavetina, zamazeri fatgo nehu'na, zamavumarora nentoe. E'ina hu'negu knare tamavu'tmavama hu'zanku nentahitma, tamagu'a rukrehe huta fatgo huta maniho. ²⁰ Keho, Nagra kafante oti'ne'na vagre vagre nehue. Iza'o Nagri nageru antahino, kafama anagisimofona, Nagra efre'na agrane ne'zana nesugeno, agra Negrane negahie. ²¹ Iza'o ha'ma azeri agateresimofona, Nenfa trate'ma ha'ma azeri agatere'na mani'noaza huno, ha'ma azeri agateresimofona, atresugeno Nagri trate magoka manigahu'e. ²² Iza'o agesama me'nenigeno'ma nentahisimo'a, Avamu'mo'ma mono nagate'ma

huama'ma nehiankea antahise hino.

4

Monafi me'nea zantami Joni'a ke'nea naneke

¹ Ama anazama evutege'na, nagra kogeno, mona kafamo'a anagino ruhagro higeno, ese ageru'ma antahi'noa agerumo ufenkrafama hiaza nehige'na antahugeno, Nagrikura anage huno hu'ne, **Amare ege'na, amazama evanigeno, henkama fore'ma hania zana kaveri haneno.** ² Anage nehige'na ame hu'na nagra avamupi mani'ne'na koana, mona kumapina kini tra me'negeno, mago'mo ana kini tratera mani'nege'na ke'noe. ³ Ana ne'mofo masa'amo'a rumsa huno jasapa havegna nehuno, koranentike huno konilienie hu'za nehaza havegna hu'ne. Mago furagenamo kini tramofona rugagintegno, zafa asinage huno emerelie nehaza havegna huno remsa hu'ne. ⁴ Ana kini tramofona 24'a kini tratami manegorave huntegno, ana 24'a kini tratera ugota kva vahe'mo'za mani'ne'za, efeke zaza kukena hu'za, golire kini fetori zamasenirera antani'naze. ⁵ Ana tra'ma me'nefintira trage huno kopsina e'nerino, tusi'a monage nehigeno, kini tramofa avuga 7ni'a tavi tevemo'a havana havana huno te'ne. E'i ana 7ni'a tevema havana havana huno nereana, Anumzamofa 7ni'a Avamutami me'ne. ⁶ Hagi ana kini tra'mofo avuga, kapoteti tro huntageno masanentake huno rumarave nehiankna hageri megeno, ana kini tramofa amu'nompine rugaruga, 4'a asimu anteno mani'nea zagaramina, zamavugane

zamefika zamavurgamo'a avite'nea zagamo'za mani korave hu'nazage'na zamage'noe. ⁷ Ese'ma mani'nea zagamo'a laionigna higeno, anante zagamo'a kaogna higeno, nampa 3zagamofona vahe avugosagna higeno, nampa 4zagamofona hareno vano nehia tumpamofo avugosagna hu'nea zaga ke'noe. ⁸ Hanki anama kasefa hu'za mani'naza 4'a zagamofona, mago magomofona 6si'a agekona huzmantegeno, zamagekonamofo fenka kizigane, zamavugane zamefi'enena zamavurgamo'a hakare huno avitenege'za, ontagane'za zagene hanine anage nehaze, ***Ruotage hu'nane ruotage hunane, Ra Anumzamoka Ruotgera hu'nane, Hanavenentake hunka, Ko mani'nenka, menina mani'nanankinka, henka egahane*** hu'za nehaze. ⁹ Hanki anantema zamasimu ante'za mani'naza zagamo'za, kini tratema mani'nea Ne'mofo husga hunte'za, ra agi nemi'za, susu hunte'za Agra manivava hugahie hu'za agia erisaga huvava nehazageno, ¹⁰ ana 24'a ugota kva vahe'mo'za, kini trate'ma mani'nea Ne'mofo avuga zmavugati zmarena omere'za umase'za, manivava nehia Nera mono hunente'za kini fetorira, ana kini tra'mofo avuga zafi netre'za, anage nehaze, ¹¹ Kagrake knare hunka mareri'nane, tagri Ra maninka, tagri Anumza mani'nane. Kagrake rankagia e'nerinka, kagia erisaga nehageno, hanavekamo'a marerinie. Na'ankure Kagri kavesite maka zana efore huno me'ne hu'za hu'naze.

Avontafe'mofo naneke

¹ Hanki kini trate mani'nea Ne'mofo tamaga azampine agu'afine amefiga'anena, avo krente'nea avontafera, 7ni'a fukinu rekamrente'nege'na ke'noe. ² Ana hige'na kogeno hanavenentake ankeromo ranke huno anage hu'ne, Iza knarera hu'ne'nimo, ama fuki'ma rekamrente'nea avontafera erignopeno erivaka regara hu'ne? ³ Hanki monafi mani'nesimo'o, mopafi mani'nesimo'o, mopa agu'afi mani'nesimo'a, mago'mo'e huno ama ana avontafera erivaka orege, agu'afina erivakareno kegara osu'ne. ⁴ Ana hige'na krafage hu'na zavira ate'noe. Na'ankure mago'mo'e huno ana avontafera erivaka orege, agu'afina kegara osu'nege'ne. ⁵ Ana 24'a (elda) kva vahepinti mago'mo anage huno nasami'ne, Zavira otenka ko! Juda naga'nofipinti Deviti negeho ha'ma agatere'nea Laionimo, Agra 7ni'a fukina eriganopega hu'neankino ana avontafera erivakarega hu'ne.

Sipisipi afu anenta Joni'a ke'nea naneke

⁶ Anante kogeno mago Sipisipi anentamo'a kini tramofone, 4'a kasefa hu'za zamasimu'ma ante'za mani'naza zagaramimofo amu'nompi oti'nege'za, 24'a elda kva vahe'mo'za regorave hunte'naze. Ana Sipisipi anentara korapama ahe'naza Sipisipi anenta kna hu'ne. Ana Sipisipi anentamofona 7ni'a pazive huntogeno, 7ni'a avurga hunte'neankino, e'i ana avurgamo'a Anumzamofa 7ni'a avamutaminkino, maka kaziga mopafi huzmantege'za nevaze. ⁷ Hagi Agra vuno trate'ma mani'nemofa tamaga

azampintira avontafera omeri'ne. ⁸ Hagi ana Sipisipi afu anentamo'ma avontafe'ma omenerige'za, 4'a zamasimu eri'za mani'naza zagaraminki, 24'a (elda) kva vahe'mo'za, Sipisipi anentamofo agafi zamarenare'za magoke magoke'mo'za zavena (harp) eri'ne'za, zamente zamente manantake'zama kre sramnavu'za mevite'nea golire zuompa eri'nazana, e'i anazana Anumzamofa naga'mofo nunamune. ⁹ Hagi zamagra kasefa zagame nehu'za anage hu'naze, Kagra avontafera erinka rekamrente'naza fukintamina eriganopega hu'nane. Na'ankure Kagrira kahe frizagenka koranka'anu, mika nofi nagapinti'ene, zamagerupinti'ene, vahepinti'ene, mopafi vahera mi'za sezmente'nane. ¹⁰ Kagraka'a kumaka'afi huhampri zmantanke'za, kinimofo pristi vahe trohu'za manizanki'za, zamagra ama mopafi veara kegava hu'za manigahaze. ¹¹ Anantera nege'na nentahugeno, rama'a ankeri vahe'mo'za kini tra'mofona regagi'ne'za, kasefa hu'za mani'naza zagamo'zane, 24'a elda kva vahe'mo'zane, tusi'a hampriga osuga'a vahe'mo'za, ¹² ranke hu'za anage hu'naze, Agri'ma ahazageno fri'nemo, hanavene so'e feno zane, knare antahi'zane, himamu hanavene, husga huno ra agia ami'zana Agrake erigahie. ¹³ Hanki maka'zama tro huzmantege'za zamasimu ante'za monafine, mopamofo agu'afima mani'naza zagamo'zane, hagerimpi mani'naza zagamo'za, nentahuge'za anage hu'za, Kini trate'ma mani'nemo'ene Sipisipi anentamo'a asomu'ene ra agine, kegavamahu hanavemo'a, Zanagrite mevava hugahie hu'za hu'naze. ¹⁴ Kasefa

hu'za mani'naza 4'a zagamo'za tamage hu'za huvava nehazageno, 24'a (elda) kva vahe'mo'za zamarenare'za mono huznante'naze.

6

Ese fuki avontafeteti eriganope'nea naneke

¹ Anante nagra kogeno, Sipisipi anentamo 7ni'a fukinu rekamerente'nea avontafepinti, mago fuki eriganopegeno, 4'a kasefa hu'za mani'naza zagafinti mago'zmimo'a monage'mo'ma hiaza huno anage hu'ne, Eno! ² Hige'na anante negogeno, efeke hosi afu'mofo agofetu'ma mani'nemo'a, ati eri'negeno kini fetorira amigeno, harafa vahe'mo ha' huno zamagtereno viankna huno vu'ne.

³ Anante'ma Sipisipi anenta'mo nampa 2 fukima rekamrente'nea avontafera, eri kanopegeno, kasefa huno mani'nea zagafinti nampa 2 zagamo'a eno, hu'ne! ⁴ Anantera mago koranke hosi atiramino egeno, hosi afumoyo agofetu'ma mani'nemofona hanave amigeno, rimpa fruma erino mopafi mani'zana eritregeno, vahe'mo'za ohefri ahefri hanazegu, bainati kazina agrira ami'ne. (Mat 24:6-7.)

⁵ Anante nampa 3 fukima rekamare'nea avontafe Agrama eri kanonepegeno, kasefa huno mani'nea nampa 3 zagamo'a anage hu'ne, Eno. Hige'na koana mago hanike hosi egeno, ana hosimofo agofetuma mani'nemofona maka'zama refko huno kna'ama ke'za sigeli azampina me'ne. ⁶ Hagi anantera antahugeno monagemo'ma hiaza huno 4'a kasefa hu'za mani'naza zagaramimoyo amu'nompintira anage hu'ne, Mago knamoyo erizante miza eriankna huno mago osi witi ku

erigeno, mago knamofu erizante miza eriankna huno, 3'a onesisi bali enerinka, masavene waininena eri haviza osunka atregeno me'no hu'ne.

⁷ Anantera Sipisipi anentamo'a avontafe'ma nampa 4 fukima rukamare'nea eriganopegeno, kasefa huno mani'nea nampa 4 zagamo'a eno! hu'ne. ⁸ Hige'na anantera kogeno, kanifuge hosimofu agofetu'ma mani'nemofona agi'a, fri'zane huno me'ne. Higeno fri vahe kuma'mo'a amage avaririno ne-egeno, vahe'ma zamahe fri hanave amigeno, 4'a kevu vahe'ma mani'nafintira, mago kevu vahera bainati kazinu'ene, agama ate'zamo'ene, krimo'ene ama mopafi afi zagamo'zane, tusi zagamo'za zamahehana hanage'za frigahaze.

⁹ Anantera Sipisipi anentamo'ma avontafera nampa 5 fukima rukamare'nea eri kanonepegeno, kre sramnavu ita agafafintira, Anumzamofu ke'ma nentahi'za amage'ma nentazageno, zamahage'za fri'namo'za, ¹⁰ ranke hu'za kezati'za, Ramoka Ruotge hunka tamage nehamoka, Kagra tagri koramofu nona'a, nazupa keaga huzmantenka mopafima mani'naza vahera refko huzmantegahane? hu'naze. ¹¹ Hagi efeke kukena anamokizmia hunezmanteno, akoheta osia knafina mani fru hunenkeno, mago'a Anumzamofu naga'ene neramafugizmia, tamagri'ma tamahe fri'neaza hu'za zamahe fri vagareteno huno hu'ne.

¹² Anante avontafete'ma nampa 6 fukima rekamarente'neana, Agra eri kanopege'na kogeno, tusi'a iminkrefa mopafina erigeno,

zagemo'a hinunke kukenagna higeno, ikamo'a korankna huno koranentike higeno, ¹³ monafi hanafitamimo'a, hanave zahomo fiki zafamofu eritagosi higeno afuore ragamo tagiramiaza huno, mopafi atafri rami'naze. ¹⁴ Hagi negogeno monamo'a sagane huno, harontafe regazarino neviankna huno nevigeno, maka agonamo'zane, ti amu'nompni me'nea mopamo'za kuma'zamia atre'za vu'naze. ¹⁵ Anantera ama mopafi kini vahe'mo'zane, marerisa vahe'mo'zane, harafa vahe'mo'zane, feno vahe'mo'zane, hanave vahe'mo'zane, maka kazokzo eri'za vahe'mo'zane, fru hu'za mani'naza vahe'mo'za, zamagra havegampine, agonafi me'nea havefi fraki'naze. ¹⁶ Ana nehu'za agonamofonku'ene havemofonkura anage hu'naze. Tagri tagofetu eraminka, kini trate'ma mani'nemofu avure'ene, Sipisipi anentamofu rimpa herante zampintira refiteranto. ¹⁷ Na'ankure Anumzamofone, Sipisipi anentamofu zanarimpama kumi vahe'ma aheznante'za refkoma ha'a rankna hago efore nehianki, iza zanavurera otigara hu'ne? hu'za hu'naze.

7

144 tauseni'a Israeli vahe'mo'za Anumzamo huhampri zamante'nea avame'za eri'naza naneke

¹ Anama hutege'na kogeno, 4'a rugaraga asoparega ama mopamofona ankeru vahe'mo'za oti'ne'za, 4'a kaziga e'neria zahora zamazampi azerinageno, mopafine hagerimpine, zafafinena zahora e'ori'ne. ² Hagi anantera kogeno mago ankeromo'a zage hanati kazigati ehanatino,

manivava Anumzamo hunagru huno nagrizane hu'nea avame'za, erineno mopane hagerine eri haviza hugahaze huzmante'nea 4'a ankeru vahera ranke huno zamasami'ne. ³ Mopane hagerine, zafaraminena zamazeri haviza osu'nenketa, Anumzamofu kazokzo eri'za vahetamimofu kokovite avame'zana rekamare antezmantetaneno hu'ne. ⁴ Anantera antahugeno avame'za rekamare zmante'nea vahe'ma hamprineana 144 tauseni'a mani'naze. Ana vahera maka Israeli mofavreramimofu naga nofipinti vahetami hampri'ne. ⁵ Juda nagapintira 12 tauseni'a huhamprino, avame'za rekamrezmanteno, Rubeni nagapintira 12 tauseni'a huhamprino, avame'za rekamare zamanteno, Gati nagapintira 12 tauseni'a huhamprino, avame'za rekamare zmanteno, ⁶ Asa nagapintira 12 tauseni'a huhamprino, avame'zana rekamarezmanteno, Naftali nagapintira 12 tauseni'a huhamprino, avame'zana rekamarezmanteno, Manase nagapintira 12 tauseni'a huhamprino, avame'za rekamarezamanteno ⁷ Simioni nagapintira 12 tauseni'a huhamprino avame'zana rekamarezmanteno, Livae nagapintira 12 tauseni'a huhamprino, avame'za rekamarezmanteno, Isaka nagapintira 12 tauseni'a huhamprino, avame'zana rekamare zamanteno ⁸ Zebuluni nagapintira 12 tauseni'a huhamprino, avame'zana rekamarezmanteno, Josefe nagapintira 12 tauseni'a huhamprino, avame'zana rekamare zamanteno, Benzameni nagapintira 12 tauseni'a huhamprino, avame'zana rekamarezmante'ne.

Tusi'a vea kevumo'za Anumzamofa mono hunte'naza naneke

⁹ Anazama hutege'na kogeno, tusi'a vahekrefa mago'mo'e huno hamprigara osu'nea vahe'mo'za maka kumapinti'ene, naga nofipinti'ene, vahepinti'ene, maka agerupinti'ene, Sipisipi Afu anentamofa tra'mofa avuga, efeke za'za kukena hu'ne'za, zamazampina tofe zafamofa ani'na hantagi'za eri'ne'za oti'naze. ¹⁰ Zamagra ranke hu'za anage hu'naze, Tagri Anumzama trate'ma mani'nemo'ene, Sipisipi anentamo'ene, tagu'vazine tahokehena'e hu'za hu'naze. ¹¹ Mika manigagi'naza ankeru vahe'mo'zane, ugagota kva vahe'mo'zane, 4'a kasefa hu'za mani'naza zagamo'za, kini tramofona manikanegi'za z mavugosaregati zamarenare'za umase'za, Anumzamofa mono hunte'za, ¹² amanage hu'naze, tamage husgama hunte'zane, ra agine, knare antahi'zane, muse hunte'zane, antahisga hunte'zane, hihamune hankavea Anumzamo eri vava hugahie tamage hu'za hu'naze!

¹³ Hagi anante 24'a ugagota kva vahepinti mago'mo nantahigeno, Amama efeke zaza kukenama hu'nazana, zamagra iza'za mani'ne'za, igati zamagra e'naze? Hige'na, ¹⁴ nagra anage hu'na asami'noe, Ranimoka kagra antahi'nane hu'na hugeno, Agra anage huno nasami'ne, Ama'i zamagra tusi'a hazenkezampi ufretageno ha' vahe'mo'za nezamahazageno, za'za kukenazamia Sipisipi Anentamofa koranteti sese hugaru huzmantage'za efeke hu'namoze. ¹⁵ Na'ankure ama ana agafare, Anumzamofa kini tra avuga oti'ne'za hanine

zagenena Agri ra mono nompri eri'zama'a erinentazankino, trate'ma mani'nemo'a, Agra kegava huzmantegahie. ¹⁶ Zamagrira zmagamate'zane, tinku zmavesizane omnena, zage hara zamave'osina, amuhogura osugahaze. ¹⁷ Na'ankure tra'mofo amu'nompima mani'nea Sipisipi anentamo, kegava huzmanteno asimu erino mani tinkapuite vanigeno, Anumzamo'a maka zamavunura eri ho'mu huzmante vagaregahie huno hu'ne.

8

Sipisipi anentamo nampa 7ni fuki erikanope'nea naneke

¹ Hanki anante Sipisipi anentamo'ma avontafeteti nampa 7ni fukima eri kanopegeno, monafina hafu'a auafi *agastasana eritagane'ne. ² Anantera Anumzamofu avuga 7ni'a ankeru vahe otinamokizmia 7ni'a ufe eri nezamizage'na ke'noe. ³ Anantera mago ankeromu golire tro hunte'nea zuompa eri'neni kresramna vu itare eme otigeno, Anumzamofu kini tra'mofo avuga golire tro hunte'naza kre sramnavu itare Anumzamofu nagamokizmi nunamune erinteno kresramna vanigu rama'a mananentake'zana ami'ne. ⁴ Hagi mananentake zamofu tevegumo'ene, Anumzamofu naga'mofo nunamumofu mna'amo'a, ankeromofu azampinti marerino Anumzamofu avure vu'ne. ⁵ Anantera ankeromu'a zuompa erino kre sramnavu itaretira, golire tro hunte'naza zuompafi tevea

* **8:1** hafu'a auafi tagerupina haf auama krezamo'a amuhu hu'ne.

tagino eri aviteteno, matevuno mopafi atregeno, tusi'a monage nehigeno, kopsina e'nerigeno, imi eri'ne.

Nampa 4 ankeromo ufere'nea naneke

⁶ Hanki anantera 7ni'a ankeromo'za 7ni'a ufe erine'za, ufe renaku retro hu'naze.

⁷ Ese ankeromo uferegeno, komopa ko'ene korane tevea eri havia hu'neana, zamagra mopafi matevu'za atrazageno, tagufa kevufintira, mago kevu mopamo'a teveregeno, tagufa kevu zafafintira, mago kevu zafamo'za teverazageno, maka zafa sinage tra'zamo'za tevere'naze.

⁸ Nampa 2 ankeromo ufe regeno, ra agona gnazamo'a teve neregeno hagerimpi mate vuno atregeno, tagufa hageri me'nefintira, mago hagerimo'a koranke higeno, ⁹ tagufa kevu hagerimpi zagrami mani'nefintira, mago kevumo'za frizageno, tagufa kevu venterami me'nefintira, mago kevu ventemo'za haviza hu'naze.

¹⁰ Nampa 3 ankeromo'a uferegeno, ra hanafimo monafinti teve taginaku kasagasa hu'za taginefa hiankna tavimo remsa huno atafariramigeno, tagufa kevu tira me'nefinti mago kevu tirante'ene osi tinte'ene kampui tinte'ene takaure'ne. ¹¹ Ana ofumofu agi'a Akahe'ne, hu'za hu'naze. Tagufa kevufinti, mago kevu timo'za akahazageno, rama'a vahe'mo'za ana tina nene'za fri'naze. Na'ankure ana timo'a akahunegenoe.

¹² Nampa 4 ankeromo'a ufe regeno, zagemofona tagufa kevu refko higeno, ikamofona tagufa kevu refko higeno, tagufa kevu hanafitami me'nefintira, magoke magoke kevuzmia amasagigeno haninki'ne. Mago zage ferumofoma

tagufa kevu masama me'nefintira, mago kevu masamo'a hani hu'ne. Hanimu'enenana anazanke hu'ne. (Mat 24:29.)

¹³ Anantera nege'na antahugeno, mago tumpamo monamofo amu'nompi hareno enevuno, ranke huno anage hu'ne, Kva hiho, kva hiho, mopafima mani'naza vahe'mota hazenke ne-eanki kva hiho. Na'ankure 3'a ankeru vahe'mo'za ufena ore'nazanki'za, kofa knafi ufena regahaze!

9

¹ Hagi anantera nampa 5fu ankeromo'a ufe regeno, monafinti hanafimo'a mopafi atafari-ramige'na kogeno, riga omne kerimofo kinofira ami'ne. ² Higeno agra riga omne keria anagigeno, tusi teve nerefinti atiramino eviankna huno, ana kerifintira teve tokimo'a evu'ne. Zagene zahomofona ana kerifinti teve tokimo refitegeno tusi hani hu'ne. ³ Anantera ana teve tokipinti kenu-tamimo'a atiramino ama mopafi evigeno, segintavemofo hanavema ama mopafima ami'neaza huno hanave zami'ne. ⁴ Hanki ana kenutamimofonkura anage huno zmasami'ne, Mopafima me'nea tra'zana eri havizana osuge, zafasinage huno me'nea tra'zana eri havizana osuge, zafa eri havizana osiho. Hianagi Anumzamo'ma hunagru hu'nea avame'zama kokovite'ma rukamare onte'nesia vahe'mokizmige zamazeri havizana hiho hu'ne. ⁵ Ana nehazageno anage huno huzmante'ne, vahera zamahe ofrigahazanagi, 5fu'a ikamofo agu'afi zamatazanke zamihuhuno huzmante'ne. Ana zamatazama zami'nea knazamo'a segintavemo'ma vahe'ma

zamaprigeno zamatama kriančna zamata kri-
gahie. ⁶ Hanige'za ana knafina vahe'mo'za frisaza
kanku hakaregahaze. Hianagi ofritfa nehu'za,
frinaku hugahazanagi, fri'zamo'a zamagritetira
fresige'za ofrigahaze.

⁷ Hanki ana kenu tamimofoma ke'noana
zamavu'zamava'mo'a hosimo hate vunaku
retro hiančna nehazageno, zamasenirera
golire tro hunte'naza kini fetori knaza
megeno, zamavugosamo'a vahe'mofo
zamavugosagna hu'ne. ⁸ Zamazokamo'a

a'nemofa zamazokamo'ma hiaza huno za'za
higeno, zamavemo'a laionimofa avemo'ma
hiančna hu'ne. ⁹ Zamimizarera hankomo'a
me'ne, ana hankomo'a, aenire hankogna
hu'ne. Zamagekonamofa zamagasasankemo'a,
hosiramimo renteno avazu huno nevia zamo,
hate vunaku agareno nevigeno neriančna
agasasaru'ne. ¹⁰ Ana kenutamimofona

zamarisona me'negeno, ana zamarisonamo'a
segintavemofa risonagna hu'negeno ana
risonanu vahera nezamare. Ana risonamofona
5fu'a ikampi vahe'mofona zamatama zami
hanave'a zami'ne. ¹¹ Hanki zamagrira mago
kinimo kegava huzmante'ne, ana kinia ariga
omne kerimofa kva ankeronkino, agi'a Hibru
kefina Abadonie (fri'ne hu'ne) hu'za nehaze.
Mikaza eri havizahu nere nehu'za, Griki kefinena
Apolonie hu'za agi'a neheze.

¹² Hanki nampa 1ni knazankuma kva hiho
hu'nea knazamo'a evigeno, tare knazamo ne-
eanki kva hiho.

¹³ Anante nampa 6si ankeroma uferegeno,
nagra antahugenno Anumzamofa avurega golire

tro hunte'naza kresramnavu itareti 4'a pazive me'nefinti mago'mo huno, ¹⁴ nampa 6gisi ankeromo ufema erinemofona ana agerumo'a asamino, Yufretis rantinte'ma 4'a ankerona anaki zamante'nazana katufe zamantrenke'za viho huno hu'ne. ¹⁵ Hanki 4'a ankeroma retro'ma huzmantege'za mani'naza ankerona katufe zamantrenige'za ana auagi, ana zage knagi, ana ikanki, ana kafumofu kna fatgore, 3'a kevu refko vahera hu'za, mago kevu vahe'mokizmia mika zamahe vagaregahaze. ¹⁶ Hagi hosi agumpima mani'naza ha' vahe'mokizmi nampamo'a 200 milioni'a mani'naze nehige'na antahi'noe. ¹⁷ Hagi amanahu'za avanagnazama kofina ke'noe, hosi afutamimofu agumpima mani'ne'za eri'za nevaza vahe'mo'za zamimizare'ma rufite'naza hankozmimofu avoma'amo'a, koranke nehigeno, hokonke nehigeno, kaninkruke nehigeno, tevene salfa havemo toki nehigeno, ana hosi afutamimofu zamagenopamo'a laioni agenopagna nehigeno, zamagipintira tevene, salfa havemo'a toki hiankna huno atiramino evu'ne. ¹⁸ Zamagipinti'ma evu'nea tevemoki, salfa havere'ma nerea tevemo, ana 3'a knazamo maka kokankonka 3'a kevu vahepinti, mago kevu vahera zamahe vagarege'za fri'naze. ¹⁹ Na'ankure hihamu hanavemo'a ana hosiramimofona zamagipine zmarisonafine me'ne. Ana hosiramimofona zmarisonamo'a, osifavegna huno asenia huntogeno, ana aseniretira vahe'mofona hazenke zamigahaze.

²⁰ Hagi ana knazamo'ma ozmahege'za mani'naza vahe'mo'za, kumi'ma hu'naza zankura

zamagu'a rukrehera nosu'za, hankromofona*
 mono hunonte'za, zamagra'a zamazampinti
 golire'ene silvare'ene brasire'ene havere'ene,
 zafa atupare'ene, z mavua onkege zmagesa
 ontahige kaza osu'za tro hunte'naza zante
 monora hunte'naze. ²¹ Ana nehu'za vahe'ma
 zamahe nefriza, avuatga ha' nehu'za, monko
 avu'ava'ma nehu'za, kumzafama nesaza zankura
 magomo'e huno agu'a rukrahera osu'ne.

10

Mago ankerone osi avontafemofu naneke

¹ Hagi anante mago hanavenentake ankeru
 kogenu, mona atreno eramigenu kukena
 hamponu huntenu, furegenamo asenire megenu,
 avugosamo'a zagegna higeno, agimo'a no azeri
 hanaveti avempa zafagna huno teve anefa
 hu'ne. ² Azampina osi avontafe vakarente'nea
 eri'ne. Ana ankeromo'a tamaga agia hagerimpi
 reno, hoga agia mopafi reno otineno, ³ ranke
 huno laionimo ageru neriankna huno agerura
 nerigeno, 7ni'a monage'mo'za zamagerura
 ru'naze ⁴ Ana zmagerura nerazage'na, avompi
 krentenaku nehugenu'a, monafinti anage huno
 hu'ne, 7ni'a mona ageru'ma antahi'nana eriginka
 rekamrenentenka, avontafepina kreontenka
 atregeno frakino meno huno hu'ne. ⁵ Anantera
 kogenu hagerimpima tamaga agama nentenu,
 hoga agama mopare'ma ante'nea ankeromo'a
 tamaga azana monafinka rusute'nagamu atreno,
⁶ huvempa kea manivava nehimofonte huno,

* **9:20** Hankrorema hu'neana, havi avamuku hu'ne.

Monane maka'zama agu'afima me'neazama tro'ma nehuno, mopane maka'zama agu'afi me'neazama tro nehuno, hagerine maka'zama agu'afi me'nezama tro'ma hu'nemokino, mago'ane avega ontegahie. (Eks-Ati 20:11, Diu-Kas 32:40, Dan 12:7) ⁷ Hianagi nampa 7ni ankeromoma ageruma runakuma nehigeno'a, Anumzamo'ma oku'a ante'nea kea, kasnampa eri'za vahetema asami'nea kemo'a efore hugahie.

⁸ Anante monafinti'ma ko'ma antahi'noa agerumo'a mago'ane kea hunamino anage hu'ne, Vunka hagerimpine mopafinema agamareno oti'nea ankeromoyo azampima vakarente'nea avontafera omerio huno nasmi'ne. ⁹ Hanki anage hige'na nagra vu'na, osi avontafe naminogu ana ankeromoyo ome antahigogeno, agra anage huno nasami'ne, erinka nesankeno'a karimpafina aka hugahianagi, kagitera tumerimo'ma hiaza huno tusi haga kavesigahie. ¹⁰ Ana osi avontafera ankeromoyo azampintira nagra omeri'na nogeno, nagipina tume rimo'ma hiaza huno haga hige'na netogeno, narimpafina tusi aka ahe'ne. ¹¹ Anante zamagra nagrikura anage hu'naze, Kagra mago'ane rama'a vaheku'ene kumataminku'ene, zmagerukuma, kini vahekura kasnampa kea ome huo hu'za hu'naze.

11

Tare netremoke huama hana'azamoyo naneke

¹ Anante mago azota anteno mesarimi huno ke'za nenamigeno mago'mo huno, Anumzamoyo ra mono none, kresamna vumentaza ita azota

antenka mesarim nehunka, anampima mono'ma hunentaza vahera, hamprinka ko. ² Hagi ra mono nomofo megi'a kumara azota antenka mesarimia osunka atro, na'ankure megia vahe'mofo zamineankino, 42'a ikampi ruotge'ma hu'nea rankumara, zamagareti eme repehana hugahaze. ³ Hanki ana hanige'na Nagri nanekema huama hana'a netrena, hanavea zanami'nuge'ne, 1,260'a zagegnafi zanasunku kukena huke, kasnampa kea huama hugaha'e.

⁴ Ama ana netrena, tare olivi zafane, tare lamu tavikna huke, maka ama mopamofo Ramofo avugama oneti'a netrene. ⁵ Hanki iza'o ana netre'ma znahenakuma hanamokizmia, znagipinti tevemo'a hagana hagana huno atiramino ana vahera tefanane hugahie. Hagi ina vahe'mo'za znahenaku'ma hanamokizmia, anahukna kante ahegahie. ⁶ Ama ana netremokeya monama eriginakeno ko'ma orania hanavea erina'ankino, kasnampa kema huamama hana'a knafina, kora azerinakeno norina, tina amne eri koranke nehuke, zanagrira zanavesisiaza huke amne mopamofona knazana amigaha'e. ⁷ Zanagrama ana nanekema huvagamaretakeno'a, riga omane kerifinti'ma etiramino esia afi zagamo hara huznagatereno zanahe frigahie. ⁸ Hagi ana znahe frisia zanavufamo'a, rankuma'mofo kampi me'nenigeta, e'i ana kumaku fronka ke huta Sodomune Isipie huta hugahune. E'ina kumapinke Razanimofona rugeka zafare ahe'naza kumapi, zanavufgamo'a megahie. ⁹ Ama ana fri'na'a znavufgamofona 3'a knagi mago

zageferupi mene'nige'za, maka vahepinti'ene, naga nofipinti'ene, zmagerupinti'ene, maka kazigati vahe'mo'za znagegahaze. Hianagi kerifima eriza ome aseznante zankura i'o huzmantegahie. ¹⁰Hagi mopafima mani'namo'za ana kasnampa netrema fri'na'a zankura musena nehu'za, ana zankura ne'zana retro hu'za nene'za, musezana omi ami hugahaze. Na'ankure ana tare kasnampa netremokea mopafima mani'naza vahera zamatazama zami'naza zanku, ana musena hugahaze. ¹¹Hianagi 3'a knagi mago zageferu evanigeno'a, Anumzamo'a zanasimura zanamina, zanagra oti'nakeno, kesaza vahe'mo'za tusi kore hugahaze. ¹²Hagi ana netre'mokea nentahikeno, monafinti ranke huno, amare emareri'o huno higene, ha'ma reznante'naza vahe'mo'za nezanagage'ne hampompi monafi mareri'na'e. ¹³Anama neha'a kna fatgore tusi'a imi erigeno 10ni'a ranku'ma me'nefinti, mago rankuma'mo'a fragu vaziramigeno, 7 tauseni'a veara imimo'a zamahe fri vagaregeno, mago'amo'za kore hu'za monafi Anumzamofu ra agi erisaga hu'naze.

¹⁴Hanki nampa 2 knazamo'a agatereno evige'na negogeno, nampa 3 knazamo'a ame huno fore hu'za nehianki kva hiho.

Nampa 7ni ufe re'nea naneke

¹⁵Anante nampa 7ni ankeromo ufe regeno, ranke hu'za monafintira kezati'za anage hu'naze. Ama mopafi rankumamo'a, tagri Ramofu kuma nesenkeno, Agri Kraisi kuma fore hinkino, Agra kini manino kegava huvava hugahie. ¹⁶Hanki 24'a ugagota kva vahe'mo'za kini trate'ma

Anumzamofu avuga mani'nazareti, atre'za zamavugosaregati emase'za, Anumzamofu mono hunente'za, ¹⁷ anage hu'za, Hanavenentake Ra Anumzamoka, tagra rankagi kamune, korapa mani'namoka, menina mani'nane, na'ankure Kagra tusi'a hihamu hanave e'nerinka, menina erigafa hunka kini maninka kegava nehane. ¹⁸ Hagi miko kokankoka vahe'mokizmia zamarimpa nehenkeno, Kagri karimpa hezamo'a ne-enkeno, fri vahe'ma refkoma hanana knamo'a ne-enkeno, kazokzo eri'za vahe'ene kasnampa vaheka'ane mono naga'ene zamagi me'nenia vahero, zamagi omnene'nia vahe'mo'za Kagri kagigu'ma kore'ma nehaza vahera mizana nezaminka, ama mopafima vahe zamahenefriza vahera, zamahe frigahane.

¹⁹ Hagi monafima me'nea Anumzamofu ra mono nomofu kafamo'a anagi hagro higeno, Agrama huvempa ke huno huhagerafi'nea vogesimo'a, Agri mono nompintira efore higeno, kopasinamo'a trege huno vuno eno higeno, ranke huno monage nehigeno, imi e'nerigeno, tusi ko'mopa ko ru'ne.

12

Israeli vahe'ene a'mofu naneki

¹ Mago ruzahukna huno tusi'a avame'za monafina efore hige'na kogeno, mago a'mo'a zagenu kukena hu'negeno, ikamo'a agafi menegeno, asenifina 12fu'a hanafimo kini fetorikna huno asenire me'ne. ² Ana a'mo'a amu'ene huno mofavre kasenteza nehuno, ranke huno mofavre'za negegeno krafa hu'ne.

³ Anantera ru avame'za monafina efore hige'na kogeno, mago agaza hunte koranke osifavemofona, 7ni'a agenopa me'negeno, 10ni'a pazive hanatinegeno, aseniramintera 7ni'a kini fetori me'ne. ⁴ Hanki risonamo'a tagufa kevu hanafi monafi me'nefinti, mago kevu hanafira mopafi ruharfi huzmatre'ne. Ana osifavemo'a, a'mo'ma mofavrema kasentenaku'ma nehia avuga oti'ne. Anama hu'neana ana mofavre kasentenkeno aheno asga hunakrinaku oti'ne.

⁵ Anante ana a'mo ne'mofavre kasente'ne. Henka'a ana mofavremo nena huno maka vahera aeni azompareti kegava huzmantenia ne'kino, ana mofavre avreno Anumzamofonte vuno, Agri'a kini trate avreno ome antene.

⁶ Anantera ana a'mo'a kore freno Anumzamo'ma retro hunte'nea mopare ka'ma kopi umani'ne. Anantega ana ara kegava krinte'za ne'zana nemisageno, 1,260'a kna manigahie.

⁷ Hanki tusi'a ha' monafina fore hu'ne. Maikoli'ene ankeru naga'amo'za, osifavene ana osifavemofu ankeru naga'a hara huzmante'naze.

⁸ Ana osifavemofu ankeru naga'mo'za hanavezmia omnege'za, hara agateregara osazageno monafima manisaza kumara omnene. ⁹ Ana koranke osifavea asgahutregeno erami'neankino, ana ne'kura korapa mani'nea osifave nehu'za, hankrore nehu'za, Sata'ema nehaza ne'ma ama mika mopafi vahe'ma rezmatgama nehia nera, asgafetregeno ankeru naga'ane mopafi erami'naze.

¹⁰ Anante nentahugeno mago ra ageru monafinti runo anage hu'ne, Menina vahe'ma ahoke aheno agu'vazizane, hanavene, tagri Anumzamofu

kumamo'ene Agrama huhampiranteno tavaregahie hu'nea ne'mo'a, hago tusi'a hihamu eri'ne. Na'ankure tagri nerafukizmima hanine zagene, tagri Anumzamofa avure agra havige kegaga hunezmantea nera asgahu atregeno urami'ne. ¹¹ Zamagra ana ne'mo'ma ha'ma huzmantea hara, Sipisipi anentamofa koranteti'ene agenke'ama huama hazareti agatenere'za, zamagra zamavufagura nontahi'za, zamagri'ma zamahe fri'zanku'enena korera osu'naze. ¹² Na'ankure ama ana agafare, monafinka mani'namota muse hiho. Hianagi mopane hagerimoka kva hi'o, na'ankure hankromo'a tanagrite ko uramine. Keno antahinoma hiana osi'agna me'negeno, tusi rimpa nehegeno urami'ne.

¹³ Ana agaza hunte osifavemo'ma keno antahino'ma hiana mopafima mate'mavutregeno'a, ne' mofavrema kasente'nea ara eme aheni atahoza ami'naku avariri'ne. ¹⁴ Hianagi tusi'a tumpamofa agekonarere ana ara amigeno, ana a'mo'a hareno vahe omani ka'ma mopafi, ana osifavea atreno, 3'a kafugi 6gisi'a ikampi agri kuma'ma retro'ma hunte'nerega umani'nenigeno kegava huntegahie. ¹⁵ Hanki ana osifavemo'a, ana ara ti mreno vaniegu agipinti tina ruvaritregeno, tusi'a ti hageaza huno ana ara avaririne. ¹⁶ Hianagi ana agaza hunte osifavemofa agipinti'ma evu'nea rantina, mopamo ana ara aza huno ana tina agira aka huno nakri vagare'ne. ¹⁷⁻¹⁸ Ana higeno ana tusi'a osifavemo'a ana a'mofona rimpa ahenteno, maka mofavrenaga'amo'za Anumzamofa kasege

amage nente'za, Jisasi avu'avazama nevaririza naga ha' huzmante'naku vu'ne. Ana agaza hunte osifavemo hagerinkenare otino mani'ne.

13

Hagerimpinti atirami'nea afi zagamofa naneke

¹ Anantera mago afi zaga hagerimpinti hanatino marerige'na kogeno, 7ni'a agenopa megeno, 10ni'a pazive ana agenopafintira marerigeno, ana 10'a pazivetera kini fetori me'negeno, Anumzamofa huhaviza hunte agiramina zamasenire me'ne. ² Hagi ana afi zagama ke'noana lepatigna higeno, agamo'a bea agagna higeno, agi'mo'a laioni agikna hu'ne. Hanki agaza hunte tusi osifavemo agra'a hihamu hanavene, kini tra'ane maka kegavahu hanavea ami'ne. ³ Nagra koana mago agenopa ko ahenazanagi, anama ahe'naza zamo'a teganigeno so'e hunte'ne. Higeno maka mopafi vahe'mo'za antri nehu'za, muse hunte'za, ana afi zagamofa amage ante'naze. ⁴ Ana vahe'mo'za agaza hunte osifavemofo monora hunte'naze. Na'ankure ana agaza hunte osifavemo'a, afi zagamofona kegavahu hanavea ami'negu, ana vahe'mo'za monora tusi zagamofona hunente'za anage hu'naze, Iza ama tusi zagagna hu'nesimo hara huntega hu'ne? hu'za hu'naze.

⁵ Hanki Anumzamo'a atregeno, ana afi zagamo'a avufga ra nehuno, Anumzamofona azanava kea hunenteno, 42'a ikamofa agu'afi hanavea amigeno ruzahu ruzahu kaguvazana hu'ne. ⁶ Hanki ana afi zagamo'a agira aka

huno, Anumzamofona azanava kea hunenteno, Agi'amofona huhaviza hunenteno, Agri naga'ma monafinka mono noma'agna hu'za mani'naza nagara, huhaviza huzmante'ne. ⁷ Hagi Anumzamofa naga'ma ha'marezmante hanavenena amigeno, hahu zamagatenereno, maka naganofi'ma, vahe'ma, zamageru'ma maka kuma'ma, kegavama kri hanave ami'ne. ⁸ Maka ama mopafi mani'naza vahe'ma, ahe'naza Sipisipi Anentamofa asimu eri avontafepi zamagima, monane mopanema tro'ma osu'neni kre onte'nesia vahe'mo'za, ana afi zagarera monora huntegahaze. ⁹ Izago kagesa me'nenigenka nentahisamoka, antahise huo. ¹⁰ Izano Anumzamoma'ama huno, avreno kina huntegahie hu'nesimo'a, kina ome hino. Izano kazinknonteti ahefrigahie hu'nesimofona kazinknonteti ahefrigahie. Hanki ama ana zamavu'zmavazana akohe'za mani'neza kazigazi hu'za knazama eri'za vanagu kea hu'ne!

Mopafinti atirami'nea afi zagamofo naneke

¹¹ Anantera ru afi zagamo mopafinti hanatino egena kogeno, Sipisipi anentamofa tare pazivekna pazive asenirera me'negeno, kema hiana tusi'a agaza hunte osifavemofa agerukna ageru ru'ne. ¹² Nampa 2 afi zagamo'a, nampa 1ni afi zagamofo kegavahu hanave'a, agri avure eri ama nehuno, maka ama mopafi mani'naza vahera, nampa 1ni afi zagama ko'ma ahazageno namuma'amo tegani'nemofa monora huntaho hu'ne. ¹³ Anante nampa 2 afi zagamo'a ruzahu ruzahu avame'za eri fore

nehuno, maka vahe'mokizmi zamavufi kaguvaza higeno monafinti'enena tevea reno erami'ne.

¹⁴ Ana nehuno mopafima mani'naza vahera rezmataga hu'ne, na'ankure nampa 1ni afi zagamofu avufina, ruzahu ruzahu avame'za nehuno, nampa 1ni afi zagama ko'ma kazinknonu ahazageno friteno asimu'ma eri'nea afi zagamofu amema'a tro hiho huno zamasami'ne.

¹⁵ Asimu'ante hanave amizageno, ana amema'a tro hunte'naza amema'a asimu amigeno, ana amema'amo'a keaga higeno, ana amema'ama mono huontesaza vahera zamahe frigahie.

¹⁶ Hagi anante nampa 2 afi zagamo huzmanteno, mika amane vahero zamagi me'nea vahero, zago'a me'nea vahero, zago'a omne vahero, amne vahero, kazokazo eri'za vahe'mokizmia avame'za tamaga zmazante'ene, kokovite'enena krentegahaze.

¹⁷ Ana hanigeno mago vahe'mo'e huno mizasege, zagorera atrege osugahianki, ana afi zagamofu agimofu nampama eri'nenia vahe'moke mizasege, zagore atrege hugahie.

¹⁸ Vahe'mo'ma knare antahintahima eri'nenimo'a atregeno, ana afi zagamofu nampana refko huno keno, ana nampana mago ne'mofu nampakino, ana nampana 666 me'ne.

14

Sipisipi Anenta'ene 144 tauseni'a vahe'mofo naneke

¹ Anantera Sipisipi Anentamo'a Saioni agonare oti'negeno, Agri agine, Nefa aginema kokovite'ma krente'neana 144 tauseni'a vahe'mo'za magoka oti'nazage'na ke'noe. ² Ana hige'na mago

agerura antahuana monafintira agerura rama'a timofo agasasamo'ma hiaza nehigeno, mona kemo'ma hiaza nehige'na, mago ageru'ma antahuana kita (harp) ahazageno neriankna ageru nerige'na antahi'noe. ³ Ana nehu'za kini trate'ene, 4'a kasefa hu'za mani'naza zagane, 24'a ugota kva vahe zamurera kasefa zagamera hu'naze. Ana zagamera mago vahe'mo'e huno ontahi'nazankino, 144 tausen'i'a nagama maka mopafinti mizama sezamantenea vahe'mo'za antahi'naze. ⁴ Hanki ana vahe'mo'za a'nene savrira osu fatgo hu'za mani'naze. Na'ankure zamagrazmi agru hu'za mani'naze. Ama ana vahe'mo'za Sipisipi Anentamo'ma inaregama viana zamagra nevaririza vahere. Ana vahera Anumzamo'a ese hoza vasageankna huno maka vahepinti miza sezmente'neankino, Anumzamofone Sipisipi afu Anentamofo naga manigahaze. ⁵ Hagi ana vahe'mofo zamagipina havigea omnetfa higeno, hazenkezmia omane vahe zamagra mani'naze.

Tagufa ankeru vahe' mo'za ke hu'naza naneke

⁶ Hagi anantera mago ankeru kogeno monafi hareno enevuno, mevava Knare Musenkea mopafima mani'naza vahete ene, maka kumate'ene naga nofite'ene, zamagerute'ene, vahete'ene huama hu'ne. ⁷ Ana nehuno ranke huno amanage hu'ne, Anumzamofonku kore hunentetma ra agi amiho. Agrama vahe'ma refko'ma haniankna hago e'ne. Monane mopane hagerine, maka tinkampuima tro'ma hu'nemofu monora huntaho hu'ne.

⁸ Anantera nampa 2 ankeromo kota ankeromofomo amefi hareno ne-eno anage hu'ne, Babiloni tusi'a kumamo'a trakahu'ne, trakahu'ne, ana amo'a maka mopafi kumatamina, agra havi avu'avaza hanavetino hu avesizamofomo waini tina zamige'za ne'naze.

⁹ Anantera nampa 3 ankeromo'a, tare ankerofomo zanamefi ne-eno anage huno ranke hu'ne, iza'o afi zagamofone, amema'are'ma mono hunenteno, azante'ene kokovite'ma avame'zama'a eri'nenimo'a, ¹⁰ Anumzamofomo tusi'a rimpahе knazamofomo waini erihavia huno tagi avite'nea kapufinti neneno, ana vahe'mo'a ruotge ankeromo vahe'ene, Sipisipi anentamofomo avure, havere te kasinkasi nehia tevefi atazana erigahie. ¹¹ Ana afi zagare'ma mono hunente'za, amema'are'ma mono hunentesageno, iza'zo agri agimofomo avame'zama'a erisamo'za, zamatazama erisaza tevemofomo tokimo mareri vava nehina, hanine zagenena fru hu'za omanigahaze.

¹² Anumzamofomo kasege amage'nente'za zamentintima Jisasinte nehaza vahe'mo'za amanahu hugahaze, akohe'za mani'ne'za kazigazi hu'za knazana eneri'za oti hanavetigahaze.

¹³ Anante mago ageru monafinti arige'na nentahugeno anage hu'ne, Avona krento, Ramofompi mani'ne'za fri'namo'za, meninteti'ma agafa huno vaniana muse hugahaze! Ozo huno Avamumo'a hu'ne. Zamagrama maraguzati'za e'naza zana manifru hugahaze. Na'ankure zamagrama knare zamavu'zamavama hu'zama e'naza zamavu'zamavamo'a, zamagrane magoka zamage'a

zamavaririno ne-e.

Hoza hamareankna huno vahe zmavaresia naneke

¹⁴ Anante kogeno efeke hampopina Vahe'mofu Mofavregna Ne' mani'neni, golire tro hu'naza kini fetori asenire antanineno, sikolie nehaza ananke fagagino asane'nea kazi azampina eri'ne.

¹⁵ Hanki mago ankeromo mono nompinti atiramino, ranke huno hampopima mani'nemofonkura huno, kazinkno ka'a erinka kavera hamaro. Na'ankure ne'zama hamare kna e'ne, na'ankure mopafina nezamo'a afureanki ome hamaro huno hu'ne.

¹⁶ Anante efeke hampopima mani'nemo'a ananke fagagino asane'nea kazi erino, maka mopafima nenahu'nea hoza hamare'ne.

¹⁷ Anantera mago ankeromo, ra mono no monafi me'nefinti atiramino, agranena sikolie nehaza ananke fagagino asane kazi eri'negeni ke'noe.

¹⁸ Anante ru ankerona, tevema kvahu hanavema eri'nemo, kresramnavu itareti eno, ranke huno asane kazima eri'nemofonkura anage hu'ne, Sikolie nehaza ananke fagagi kazinka'a erinka waini zafa raga mopafintira tagio, na'ankure raga'amo'a afure'ne.

¹⁹ Anante ankeromo'a ananke fagagi asane kazima'a erino mopafi uramino waini raga taga huno eri atru nehuno, ana wainia erinteno rerati keru havereti tro huntene'ni atre'ne. E'i anazamo'a Anumzamofu tusi'a rimpafe knaza huvame huno me'ne.

²⁰ Rankuma'mofu meg'i'a, waini raga rerati keru havereti tro hunte'naza kerifi rehapa neti'zageno, kora'mo tusiza huno vu'ne. Hanki ana koramo'a 300 kilo mitanaza vu'ne. Hanki

tusiza huno nevuno tiru nemareno, marerino hosimofu agite ome atre avamente vu'ne.

15

Seveni knazamofu naneke

¹ Hanki anantera monafina tusi'a ruzahu avame'za fore nehige'na negogeno, 7ni'a ankeromo'za, tusi'a rimpahe knazana 7ni'a eri'naze. E'ina knazana Anumzamofu vagare rimpahe'zane. Na'ankure Anumzamofu rimpahe'zamo'a, e'i ana knazampi vagaregahie.

² Anantera kogenu mago hagerina kapokna hu'negenu, tevene eri havia hu'ne. Afi zagamofone, amema'ane, agi'amofu nampama azeri agatere'naza naga'mo'za, kapokna hu'nea hagerimofu agofetu oti'ne'za, Anumzamofu zavenu (harps) azeri'naze. ³ Anumzamofu eri'za vahe Mosese zagame'ene Sipisipi Anentamofu zagame hu'za anage hu'naze, ***Tusiza hunka ruzahu eri'za eri'nane, Ra Anumzamoka tusi hanavenentake hu'nane. Kagri kamo'a fatgo huno tamage hu'ne, maka kumapi vahe'mokizmi kini Nere!*** ⁴ ***Ramoka, iza kagrikura korera nosuno, kagi'a erisaga osugahie? Na'ankure Kagrake Ruotge hu'nane. Maka kumapi vahe'mo'za, e'za Kagri kavuga monora eme hugantegahaze. Na'ankure fatgo kavukvazamo'a eama hu'ne.*** (Eks-Ati 15:1-18, Diu-Kas 32:1-44).

⁵ Anantera ama anazama fore'ma hutege'na, Anumzamofu agi agenkehu seli mono nomo'a monafina anagi'nege'na kogenu, ⁶ 7ni'a knazama eri'naza, 7ni'a ankeromo'za, ra mono nona atre'za

atiramiza, za'za kukena (linen) hu'nazageno agru huno efenentake higeno, golire tro hu'naza nofi zamafunteti kreramino zamasoparega evurami'nea nofi hu'naze. ⁷ Anante 4'a kasefa hu'za nemaniza zagafinti mago'zmimo'a, 7ni'a golire zuompafi kasefa huno manivava Anumzamofu rimpafe knazamo mevite'nea erino, 7ni'a ankeru vahera ome zamige'na ke'noe. ⁸ Hanki ra mono nomofona, Anumzamofu masa'zamofone, Agri hihamu hanavemofu tokimo avitegeno, mago vahe'mo'a, ana ra mono nompina ufregara osu'negeno, 7ni'a knazamofu eri'zana, 7ni'a ankeru vahe'mo'za eri vagare'naze.

16

Anumzamofu 7ni'a rimpafe knazamofone Amakedonima ha'ma hnaza zamofu naneke

¹ Anantera mago ra ageru antahugeno Anumzamofu ra mono nompinti, 7ni'a ankeru vahekura anage hu'ne, Vutma 7ni'a Anumzamofu rimpafe knazama me'nea zuompa mopafina omeri tagi atreho. ² Hanki nampa 1ni ankeromo'a vuno Anumzamofu rimpafe zuompa mopa agofetu ome tagitregeno, afi zagamofu avame'za eri'ne'za amema'are'ma mono'ma hunentaza vahete haviza huno agotega namuntamimo fore hu'ne.

³ Anante nampa 2 ankeromo'a Anumzamofu rimpafe zompa'a hagerimpi tagitregeno, fri'nea vahe'mofu korankna higeno, maka zamasimu ante'za mani'naza zagamo'za hagerimpina fri vagare'naze.

⁴ Anantera nampa 3 ankeromo'a Anumzamoforimpa ahe'zana zoupafintira, ranra tiranpine osi ti tamimpinena eri tagi atregeno, maka timo'za koranke hu'naze. ⁵ Nagra nentahugeno tintamima kvama hu'nea ankeromo'a huno, Kagra fatgo hu'nane, korapara mani'nanankinka, menina mani'nane. Kagrake Ruotge hu'nane. Na'ankure Kagra ana maka'zana refko nehane. ⁶ Na'ankure zamagra Anumzamoka kagri nagaka'ane, kasnampa vaheka'amofokorama zamahe'za eri tagi atre'nagu, Kagra karimpa he'zamofokorantima zaminke'za, zamagra ana koranti nega nagaki'za ne'naze! ⁷ Anante nentahugeno kresramnavu itamo'a huno, ozo Hanaveka'ane Ra Anumzamoka, refako huzanka'amo'a, tamage huno fatgo hu'ne.

⁸ Anante nampa 4 ankeromo Anumzamoforimpahe zompa zagemofonte eritagitregeno, zagemo'a tevemo'ma hiaza huno ana vahera z mavufgare rentege'za zmatagu hu'naze. ⁹ Zagemofomuhomo'a tevemo'ma hiaza huno ana vahera z mavufgare rentege'za, zmatagu nehu'za ana knazama atregeno erami'nea Anumzamofogagi'a huhaviza hunente'za, zmagu'a rukrehe hu'za ra agi omi'naze.

¹⁰ Anantera nampa 5 ankeromo Anumzamoforimpahe knaza me'nea zuompa afi zagamofotrateritagitregeno, agrama kegava hu'nea kuma'mo'a hani higeno, ana kumapima mani'naza vahe'mo'za tusi'a zmatagu nehu'za zamagnefu'na anitragna nehu'za, ¹¹ monafi mani'nea Anumzamofonahuhaviza hu'naze. Na'ankure zmatama kri'nea zanku'ene

namuma zmare'nea zanku anara nehu'za, ana zamavu'zmavazankura zmagu'a rukrehe osu'naze.

¹² Anantera nampa 6 ankeromo'a Anumzamofu rimpahе knaza me'nea zuompa tusi'a Yufretisi tirampi tagi atregeno, ana tiramo'a ho'mu huno, zage hanati kazigati esnaza kini vahe'tamimofu ka retro hu'ne. ¹³ Ana hige'na kogeno agaza hunte osifavene, аfi zagamofu agipinti'ene, havige kasnampa ne'mofu agipintira, 3'a agru osu avamutamina hogakna hu'naza atirami'naze. ¹⁴ Na'ankure zamagra hankrotamimofu avamutamimo'za, avame'zana erifore nehu'za, maka ama mopafi kini vahete vu'za ome zamazeri atru nehu'za, tusi'a hihamu hanave'ane Anumzamo'ma vahe'ma refko hania knare'ma, ha'ma hanagu zamazeri retro hu'naze. ¹⁵ Antahio, Nagra kumzafa vahe eaza hu'na egahue Iza'o kukena'ama huno omase otino mani'nenimo'a, muse hugahie. Ana nehuno avufga avapara ovanigeno, vahe'mo'za agaze avufga onkegahaze. ¹⁶ Ana nehu'za havi avamu'mo'za kini vahe'zmine, ha' vahe'zminena Hibru kefina Amakedonie nehaza kumate zamazeri atru hu'naze.

¹⁷ Anantera nampa 7ni ankeromo Anumzamofu rimpahеzama me'nea zuompa zahopi eritagi atregeno, ra mono no agu'afi me'nea kini trateti magomofu аgerumo ranke huno, havagare hu'ne. ¹⁸ Anante kopsina e'nerino, agasasa nerigeno, monage nehigeno, tusi'a imi eri'neana, vahe'ma fore'ma huneregatira, e'inahu imina e'ori'neankna tusi'a iminkrefa eri'ne. ¹⁹ Babiloni rankumamo'a ruhantagino

3'afi fore higeno, mopafi ranra kumatamimo'za traka humase'naze. Babiloni kuma'mofo kefo avu'ava zana, Anumzamo'a antahino keno hu'neankino rimpahe waini kapu tina amigeno ne'ne. ²⁰ Ana higeno maka ti amu'nompi me'naza mopamo'za fanane hazageno, agonamo'za tamiza agupo mopa se'naze. ²¹ Hagi tusi'a komopa ko monafinti aru'neana, mago mago aragana'amo'a 50'a kilonaza hu'nea komopa komo, vahete evuramino zamahe haviza hige'za, ana vahe'mo'za Anumzamofona huhaviza hunte'naze. Na'ankure Anumzamofa rimpahe knazamofa komopa kokino, ana komopamo'a tusi havizantfa hu'neakino, vahera zmahe haviza hu'ne.

17

Mago a'mo'ma afi zagamofa agumpi mani'nea zamofa naneke

¹ Anantera 7ni'a zuompama 7ni'a ankeru vahe'mo'za azerinazafinti magomo eno nagrikura anage hu'ne, Amare ege'na tusi monko a'mo rama'a tintamimofa agofetu mani'nea a'mo'ma erisia knazana kaveri haneno hu'ne. ² Ana a'ene maka mopafi kini vahe'mo'za, rama'a monko zamu'zamaza nehazageno, mopafima mani'naza vahe'mo'za, ana a'mofo havi avu'avazamofa waini ti ne'za neginagi hu'naze. ³ Anantetira ana ankeromo'a avamupi navareno vahe omani ka'ma mopafi vige'na, nagra kogeno mago a'mo, koranke afi zagamofa agumpi mani'negeno, Anumzamofoma azanava kemahu agiramina ana afi zagamofa avufgare

mevagaregeno, 7ni'a agenopa megeno ana agenopafina, 10ni'a pazivea me'ne. ⁴ Ana a'mo'a fitunke'ene koranke kukena nehuno, golire'ene marerisa havere'ene, perie (pearls) nehaza zanteti tro hu'naza avasasezana erinehankreno, azampina maka kasri avu'ava'amo'ene, monko avu'ava'amo avite'nea golire kapu eri'ne. ⁵ Ana a'mofo kokovitera mago oku'a agi'a anage huno krente'neana, **Babilonia tusi'a agatere kumare, monko a'nemokizmine, ama mopafi kasri avu'ava zantamimofonezmarera'e** huno krente'ne. ⁶ Hanki negogeno ana a'mo'a Anumzamofone naga'mokizmi korane, Jisasi agi agenkema huama'ma nehaza naga'mokizmi korana neneno neginagi nehige'na, nege'na nagra tusiza hu'na antri hu'noe. ⁷ Hagi ana ankeromo'a anage huno nasami'ne, Nahigenka antria nehane? Ana a'ene, agofetu manino nevia afi zagagi, ana afi zagamofone 7ni'a agenopagi, 10ni'a pazive'ama me'neazamofone oku'a agu'agesa'a kasamigahue. ⁸ Ana afi zagama ke'nanana, korapa mani'neana, menina omani'neankino, kofa'a knafi riga omane kerifinti hanatino, eama huteno haviza hugahie. Ama mopama tro'ma osu'negeno, mopafima mani'naza vahe'ma zamagima asimu eri avontafepima kreonte'nea vahe'mo'za, korapa mani'neana, menina omani'neankino, henkama eama'ma hanige'za kesanu'za antri hugahaze. ⁹ Asenifima knare antahintahizama me'nenia vahe'mo'a antahi ama' hino, 7ni'a agenopa, e'i ana a'mo'ma agofetu mani'nea 7ni'a agonamo'za 7ni'a kini vahetami'ne. ¹⁰ Ana 7ni'a kini vahepinti

5fu'amo'za evuramizageno, magomo menina manigeno, magomo'a ome'neankino, esuno'a osi'a knafi kinia emanigahie. ¹¹ Hanki afi zagama korapama mani'neama, menina omani'neana, agra e'i nampa 8ti kinigino, 7ni'a kini vahepinti mago zamimokino, agra haviza hugahie. ¹² Hagi 10ni'a pazive'ma agenopafima ke'nanana, 10ni'a kini vaheki'za kuma kegavahu hanavea e'ori'nazanagi, zamagra afi zagane magoke auafi kinia manigahaze. ¹³ Ama ana kini vahe'mo'za magoke antahintahifine, mago zamarimpa hu'za hanave zamine hihamuzmia afi zagamofu amigahaze. ¹⁴ Ana kini vahe'mo'za Sipisipi Anentamofu ha' hunte'naku hugahazanagi, Sipisipi Anentamo'a zamaheno zamagateregahie. Na'ankure Agra ramokizmi, Ra mani'neni, kini'mokizmi Kini mani'ne. Agrama zamigi huno hupri zamantege'za mani fatgo hu'namo'za, Agranena manigahaze.

¹⁵ Hagi ankeromo'a anage huno nasami'ne, Monko a'mo'ma agofetu mani'negenka ke'nana tintamina, e'i zamagra mika nofi naga'ene, zamageru'ene, tusi'a vahe'ene, kumatami huvame huno me'ne. ¹⁶ Hagi 10ni'a pazive'ene afi zaganema ke'nanana, zamagra monko a'mofona zamavesra hunente'za kukena'a azeri'za erivararo hanageno mago'zana avufarera omanetfahina, avufga avapa mani'neni avufga'a nene'za, tevefi kre fanane hugahaze. ¹⁷ Na'ankure Anumzamo Agri avesi'za eri knare hanazegu, ana kini vahera antahintahi zamige'za magoke antahintahire'ene, magoke zamagu zamagesare zamagrama kegava hu'naza kumatamina afi

zagamofa amizageno, Anumzamofa kemofona avufga'a fore hu'ne. ¹⁸ Hanki ana monko a'ma ke'nanana, e'i tusi'a kumamofa hu avame huno mani'neni, maka ama mopafi kini vahe'mokizmi kegava hunezmante hu'ne.

18

Babiloni kuma'mo haviza hu'nea naneke

¹ Anazama fore'ma hutegeni, mago monafinti tusi'a hanave eri'nea ankeromoi'a eneramige'na kogeni, masa'amo'a mopafina remsa hu'ne.

² Hanki agra hanavege huno, tusi'a Babiloni kuma'moi'a evuramie, evuramie! Ana a'moi'a havi hankromoi'za mani kuma tro nehigeni, maka agru osu avamu tami'moi'za kina hanaza kuma fore nehuno, maka agru osu nama zagamoi'za mani'naza kuma fore nehuno, agru osu afi zagamoi'za mani'naza kuma fore hu'ne.

³ Na'ankure maka kumatamimpi vahe'moi'za monko avu'avazamoi'a, waini tima neaza hu'za kapu'afinti nene'za, negi ne'nazage'za mopafi kini vahe'moi'za ana a'ene monko avu'avaza nehazage'za, ama mopafi vahe'moi'za, ana a'mofi monko avu'avazamoi'areti tusi'a feni (bisinisi) vahera tro hu'za mani'naze. ⁴ Ana hutegeni mago ageru monafinti arige'na antahugeni, anage hu'ne, Vahe'nimoka ana ara atrenka atineraminka, kumira ana a'enena nehunka agranena knazamoi'a e'orio.

⁵ Na'ankure ana a'mofi kumi'moi'a, aviteno monafi marerigeni, Anumzamoi'a ana a'mofi havi avu'avazamoi'amofona agesa antahi'ne.

⁶ Ruga'amokizmima huzmante'nea kante antenka

ana ara nona hunentenka, avu'avazama hu'nea kante antenka, mago'ene erinteguhenka nona'a hunentenka, ana a'mo'ma waini tima eri havia hu'nea kapufi mago'ane eriante aguhenka erihavia humio. ⁷ Ana a'mo'a, agra'a agi erisaga nehuno, rama'a monko avu'avaza nehuno, ruga'a havi avu'ava zana hu'ne. Anama hu'nea havi avu'avazama'amofa avamente atazana aminkeno, rama'a zavi ateno. Na'ankure agra'agura anage nehie, kuini mani'na, kuini trate mani'noankina, kento a' knara osu'na, zavira otegahue hu'ne. ⁸ E'ina hu'negu magoke zagefi, knazana enerino, kria enerino, zavira netena, tusi'a agate'za agritera fore nehina, agrira (Babilonia) tevemo'a te fanane hugahie. Na'ankure tusi'a hanave'ane Ra Anumzamo, agrira refko hu'neankino haviza hugahie.

⁹ Ama mopafi kini vahe'mo'za, ana a'enema havi avu'avaza nehu'za, ana havi avu'avazampi agrane knare huta mani'none nehaza vahe'mo'zama, ana a'ma terasagesia teve tokimo'ma marerisige'za negenu'za, krafa hu'za zavira atentegahaze. ¹⁰ Ana a'ma azeri haviza haniazanku kore hu'za afete oti'ne'za anage hugahaze, tasunku hune tasunku hune, Babiloni hanave rankumakura na'ankure magoke knafi haviza hie.

¹¹ Mopafi vahe'mo'za zagonu mizaseza zagore netraza naga'mo'za (bisinisi) ana a'mo'ma havizama hiazanku zavite'naze. Na'ankure vahe'mo'za fenozazmi magoane miza osegahaze. ¹² Ana fenozana e'i goline, silvane, mareri havene, periema nehaza zane,

knare za'za tavravene, fitunke tavravene, silkare tavravene, koranke tavravene, maka sitronie nehaza mananentake zafareti tro hu'naza zantamine, elefanti afumofa ave'areti troma (ivori) hu'naza zantamine, mizama'amo mrrerinea zafareti tro hu'naza zantamine, bronsie nehazazane, aenine, mabolie nehaza havene, ¹³ zarafune (sinamon), mananentake zane, ne'za eri hagahu aka nezane, tevefi krazageno knare mna neviazane, zamavufare nefraza mananentake masavene, knare manavu zafarine (frenkinsens), wainine, olivi masavene, flaua'ene, witine, bulimakaontamine, sipisipiramine, hosi afuzagane, karisine, zamasimu eri'za mani'naza kazokzo eri'za vahe'za, izaza mizasegahaze. ¹⁴ Hu'za nehu'za ana vahe'mo'za amanage hugahaze, Babiloni kuma'moka knare'zama erifore'ma nehana zanku'ma kvenesiazane, marerisa nomanizama nemaninazamo'a kagripintira fanane hiankiza, vahe'mo'za ana knare'zanka'a onkegahaze. ¹⁵ Ana a'mofonte'ma zagore atre'za ra zagoma tro'ma huza feno vahe'ma nesaza vahe'mo'za, afete'are otiza manigahaze. Na'ankure ana a'mo'ma atama eri'neazanku kore nehu'za zavira nete'za, ¹⁶ anage hu'za, Tasunku hune, tasunku hune, knare ran kuma ana a'mo'a knare zaza efeke kukena nehuno, fitunke'ene koranke'ene, avasesezama golireti'ene, marerisa havereti'ene, periema (pearls) nehaza zane, eri hankre'neane, ¹⁷ na'ankure tusi'a fenomo'a mago auafi amnezankna hie! Ana higeno maka ventemofa azerino (kepten) nevia vahe'mo'zane, ventefi maniza nevaza vahe'mo'zane, ventefi

eri'za vahe'mo'zane, hagerimpi zantetima zagoma eri'za nomanizama retro'ma hu'za nemaniza vahe'mo'za, afete oti'za mani'neza, ¹⁸ ana a'mofoma tegasagea teve tokima nege'za, zavira nete'za anage hu'za, Ina rankuma'mo amanahu rankumakna hugahie? hu'za hu'naze. ¹⁹ Hagi ana nehu'za kugusopa kate'za zamanunte netreza ranke hu'za, zavi krafa, nehu'za anage hu'naze, Tasunku hune tasunku hune rankumamofonkura, maka feno vahe'mo'za ventema antene'za ana a'mofompintima feno vahe'ma nemaniza zamo'a magoke auafina ana maka fenomo haviza hie. ²⁰ Monamokane, Anumzamofu naga'motane, aposol naga'motane, kasnampa naga'motanena muse hiho, na'ankure ana a'mo'ma tamagri'ma tami'nea knazantera Anumzamo'a refko huno mizama'a nona huno nemie. ²¹ Anantera tusi hanavenentake ankeromo, witi refuzafu nepeankna ra have erino hagerimpi matevu netreno anage hu'ne, Havema atreankna huno Babiloni rankumara azeri haviza hugahiankita, mago'ene onkegahu'ne ²² Ana kumara fanane hinkeno, zavenama ahe vahe'ene konkene ufene, zavenagna musikima nehaza (harp) vahe'mo'za mago'ane nehesagenka ontahigahane. Keonke'zama tro'mahu vahe'mo'za mago'ane trora osanageno, witi akaruma hare'naza agerura ontahigahane. ²³ Hagi ramumofu masa'a mo mago'ane remsa huogantesigeno, a'ma eriku'ma hania ne'ene, vema eriku'ma hana'a zanagasasankea ontahigahane. Na'ankure kagri vahe'mo'za zagonu mizaseza zagore netraza naga'mo'za

(bisinisi) maka mopafi vahe'mofo avurera ra vahe mani'nazangi, maka mopafi vahera kagra avuatga zankareti rezmataga hu'nane. ²⁴ Hagi ana a'mofompina kasnampa vahe'ene, Anumzamofa naga'ene maka ama mopafima Anumzamofa amage nentazageno zamahe'nea vahe'mokizmi koramo me'nege'za ke'naze.

19

Muse zagame hu'naza naneke

¹ Hagi anazama fore'ma hutege'na, nagra antahugeno, tusi'a vahe'mokizmi zamagerukna hu'za monafinti zamageru ru'za anage hu'naze, Ra agi amisune! Masazane hihamune hanavene tahokeno tagu'vazi'zana, tagri Anumzamofa su'zane. ² Na'ankure Anumzamo'ma refko'ma hiazamo'a, tamage huno fatgo hu'ne, na'ankure tusi'a monko a'ma Anumzamo'ma refko'ma hunte'nea a'mo'a, ama mopafi vahera havi monko avu'avazama'areti zamazeri haviza nehuno, Anumzamofa kazokzo eri'za vahera zamaheno korana eritagi atrenegu, Anumzamo'a nona ana ara hunte'ne. ³ Anante ete mago'ane anage hu'naze, Anumzamofona Ra agi amisune! Ana a'mofo krerasagea teve tokimo'a mareri vava nehie hu'za hu'naze. ⁴ Anante 24'a ugagota kva vahe'mo'zane, 4'a kasefa hu'za mani'naza zagamo'za zmavugosaregati mopafi mase'za, kini trate'ma mani'nea Anumzamofa monora hunente'za, anage hu'naze, Tamage Anumzamofona ra agi amisune! hu'za hu'naze.

⁵ Hagi mago agerumo kini trateti huno anage hu'ne, Maka Agri kazokzo eri'za vahe'motane,

Anumzamofonku'ma kore'ma hunentaza vahe'motane, tamagi omne vahe'motane, tamagi me'nea vahe'mota, Anumzamofona ra agi erihentesga hiho huno hu'ne. ⁶ Anantera nentahugeno tusi'a vahe'mofo agerukna huno zmagerura neru'za, ranra timofo agasasa kegna nehu'za, tusi'a monage hiankna hu'za anage hu'naze, Anumzamofona ra agi amisune! Na'ankure hanavenentake Ra Anumzantimo'a kini manino kegava hu'ne hu'za hu'naze.

Sipisipi anentamo arave haniazamofa naneke

⁷ Tagra musenkase huta ra agi amisune, na'ankure Sipisipi anentamo'ma aravema hania kna egeno, ana ne'mofonte'ma maresia a'mo'a retro huno mani'ne. ⁸ Ana a'mofona kukenama hanigu agru huno za'za efeke kukena ami'ne. E'i ana zaza kukena Anumzamofa naga'mokizmi fatgo zamavu'zmavazane.

⁹ Anantera ankeromo'a anage huno nasami'ne, Sipisipi anentamo'ma aravema hania ne'zante'ma agima hu'nemo'a muse hino hunka krento, mago'ane anage huno nasami'ne, Ama'i tamage Anumzamofa naneke. ¹⁰ Anante nagra nena agiafi narenare'na mono hunte'za huanagi, ana ankeromo'a anage huno nasamine, E'inahura osuo, kagrane negafuzane nehazaza hu'na nagra Anumzamofa eri'za vahe mani'neta, Jisasi'ma hu'nea ke'mofo huama nehuta, Anumzamofa monora hunte'gahune. Na'ankure Jisasi'ma hu'nea kemo vahe'mofona azeri otigeno, kasnampa kea huama nehaze.

Kraisi'ma efeke hosimofa agumpi esia zamofa naneke

¹¹ Hagi monamo'a anagige'na efeke hosi afu'mofa agumpi mago ne' mani'nege'na ke'noe. Ana ne'mofonkura, hugahue huno'ma hiaza nehimo'e hu'za nehu'za tamage nere hu'za nehazamo'e. Fatgo avu'avate refko huno hara nehie hu'ne. ¹² Avurgamo'a teve anefakna nehigeno, asenirera rama'a kini vahe'mofa fetori megeno, Agrira mago agi avufarera krente'ne, mago vahe'mo'a ana agia ontahigahianki, Agrake antahine. ¹³ Ana ne'mo'a korampi re'nea zaza kukena hu'ne. Agi'ama henazana, Anumzamofa Naneke hu'naze. ¹⁴ Hanki monafi mani'naza sondia vahe'mo'za agru huno knarezantfa hu'nea efeke kukena hu'ne'za, amage ante'za efeke hosi afutamimofa agumpi vu'naze. ¹⁵ Ana ne'mofa agipintira tarekaziga asane kazi atirami'neankino, ana kazinuti maka kumapi vahera nezmaheno, aeni azompareti kini manino kegava hunezmante'na, hanavenentake Anumzamofa rimpahe knazamo'a, agareti waini regatiti nehiakna huno zmahegahie. ¹⁶ Hanki zaza kukena'are'ene amotera anage huno krentene, ***Mika kini vahe'mofa Kini manino, maka ra vahe'mokizmi Ra mani'ne huno krente'ne.***

¹⁷ Anantera mago ankeromo'a zagefi oti'nege'na kogeno, ranke huno anage hu'ne, Maka monafima hareno vano nehia nama zagagura huno, Anumzamofa tusi'a nezantera etaru hutma, ¹⁸ kini vahe'mofa zamavufgane, ugota sondia vahe'mofa zamavufgane,

hanavenentake vahe'mofo zamavufgane, hosi afu'mokizmi zamavufgane, hosimofu zamagofetu'ma nemaniza vahe'mofone, maka vahe'mofone, amne vahe'mofone, kazokazo vahe'ene zamagi omne vahe'ene, zamagi me vahe'mofo zamavufga negahaze huno zamasmine. ¹⁹ Anantera afi zagane, mopafi kini vahe'mo'zane, sondia vahe'zmimozanena eri atru hute'za, hosi afumofu agumpi Mani'nemofone, sondia vahe'anena ha' huzmantenaku eri atru hu'naze. ²⁰ Ana nehazageno ana afi zagane, havige kasnampa vahe'ene zanazerino kina rezanante'ne. Ana kasnampa vahe'mo'a, afi zagamofu avure ruzahu ruzahu avame'za eri fore nehuno, ana afi zagamofu nampama eri'naza vahe'ene, afi zagamofu amema'are mono hunentaza vahe'ene rezmataga hu'ne. E'ima rezmatga hu'nea kasnampa vahe'ene ana afi zagane mani'nakeno havere tevava nehia teve tirupi znavre atrenigeke manigaha'e. ²¹ Hanki ruga'amokizmia, hosi agumpi manino nea ne'mofo agipinti atirami'nea tare kaziga asane'nea kazimo, zamahe vagaregeno maka namaramimo'za zamavufga nevagare'naze.

20

Satanima 1 tauseni'a kafufi kina hania zamofo naneke

¹ Hanki monafinti mago ankeroma riga huonte kerimofu kine, ra seni nofi azampi eri'nenon eramige'na kogeno, ² agaza hunte osifavema, korapa osifavea, havi hankroku'ma, Sata'ema nehazankino, eme azerino 1 tauseni'a zage kafu

kina hunte'ne. ³ Ana ankeromo eme azerino riga huonte kerifi maka ama mopafi vahera vuno eno huno rezmata osaniegu, matevunetreno avazarera refiteno renkanirente'nesigeno, 1 tauseni'a zagekafua evutesigeno, atupa'a knafi anagi atresigeno maka moparega vuno eno hugahie.

⁴ Hanki anantera kini tratami me'nege'na kogeno, ana trate'ma mani'naza vahera keagama refko hanaza hanave Anumzamo'a zami'ne. Anantera kogeno, Jisasinte'ma zamentintima nehu'za Anumzamofu kere'ma amage'ma nente'za, afa zagamofu amema'are'ma mono hunonte'za, kokovite'ene zamazante'ma nampama e'ori'naza vahe'mokizmia zamanankema akafri'naza vahe'mo'za, zamasimu eri'za Jisasi'ene 1 tauseni'a kafu zagefina kini vahe manigahaze.

⁵ Ruga'a fri vahe'mo'za oraoti mani'nage'za, 1 tauseni'a kafuzage vagare'ne. Fripinti'ma omati'nazana, e'i ese kna otigahaze.

⁶ Ese knama fripinti oti'namo'za ruotge hu'nazanki muse hiho. Henka fri'zamofu hanavemo'a zamahe ofrigahie. Hianagi zamagra Kraisi'ne, Anumzamofu pristi vahe 1 tauseni'a zagekafu Kraisi'ene manigahaze.

Sata'a riga omane kerifinti atiraminia naneke

⁷ Hagi 1 tauseni'a zagekafu evutenigeno'a, Satana kina hu'nenifintira anagitrenigeno, ⁸ atiramino nevuno, zage hanati kazigane, zage ufre kazigane rugaraga soparegama ama mopafi mani'naza vahera rezmata huno, Goku vahe'ene Megoki vahe'ene ha'ma hanagura

vahera zamazeri atru hugahaze. Ana vahe'mofo nampamo'a hagerinkenafi kasepankna hu'za atru hugahaze. ⁹ Anantera ana vahe'mo'za agupofi emareri'za, Anumzamofu naga'mo'zama nemanizageno avesima nentea rankumate vu'za ome regagigahaze. Hianagi monafinti tevemo'a eramino ana vahera te fanane hugahie. ¹⁰ Hagi rezmatga hu'nea hankromofone, afi zagane, havige kasnampa ne'ma matevu zamatreniana salfa havere nerea teve tirupi mate vuzmatrena, zamagra anampina mani'ne'za hanine zagenamata erivava hugahaze.

Vagamare knazupa refkoma hania zamofo naneke

¹¹ Anantera tusi'a efeke kini tra kogeno, ana trate'ma Mani'nemofu avu kore huke monane mopanemokea frakeno, mago kumara omnetfa hu'ne. ¹² Anantera fri'naza vahe zamagogeno, zamagi me'nea vahe'ene, zamagi omane'nea vahe'mo'za, keaga refkohu trate oti'nageno, avontafetamina eri vakarente'ne, magora asimu eri avontafeki, fri'naza vahe'mo'za zamagrama hu'naza zamavu'zmava'ma krente'nea avontafe tamimpinti refko hunezmantege'na ke'noe. ¹³ Hagi hagerimpima fri'naza vahera, hagerimo'a avreno eme amigeno, fri'zamo'ene, (Hedes) fri vahe kuma'mo'enena, fri'naza vahera zamavare'za eme aminkeno, Anumzamo'a mago mago'mo'ma hu'nea avu'avate anteno refko huzmante'ne. ¹⁴ Anantera fri'zane, fri vahe kuma'enena matevuno teve tirupi zanatregeke urami'na'e. E'i ana teve tirura nampa 2 fri'zane.

¹⁵ Hanki izano agima asimu eri avontafepima kre ontensesimofona, mate vuno teve tirupi atregahie.

21

Kahefa monane mopane fore haniazamofonaneke

¹ Anantera kasefa monane, kasefa mopane ke'noe. Na'ankure ese monane, ese mopamo'a fanane higeno, mago'enena hagerina omane'ne.

² Anantera kogeno Ruotge hu'nea rankumara e'i kasefa Jerusalemo, Anumzamofontegati mona atreno eramino, a'mo'ma vema erinaku'ma retro'ma huno eaza huno e'ne.

³ Anantera antahugeno kini tratetira, ranke huno anage hu'ne, Keho! Anumzamofono mono nomo'a vahe'ene nemanianki'za, Agra zamagrane nemanisigeno, Agri vea zamagra nemanisigeno, Anumzamo Agra'a zamagri amu'nompina manigahie. ⁴ Ana nehuno maka zamavunura eri homu huzmante vagaresigeno, mago'ene fri'zana omnenkeno, zamasunku hu'za zavi'ma ate'zana omnena, zamatama krizana omnenigeno, ese'ma me'nea zantamina omnegahie.

⁵ Ana higeno kini trate'ma mani'nemo'a anage hu'ne, Nagra maka'zana eri kasefa hu'na tro nehue. Nehuno anage mago'ane hu'ne, na'ankure ama kemo'a fatgo huno tamage hu'neanki, fore hugahianki avontafepi krento.

⁶ Anantera anage huno nasami'ne, Maka zamo'a havagare, Nagrani'a (Alfa) ese agafahu mani'na, (Omega) vagarera mani'noe, ese agafahu'ene vagare'enena mani'noanki'na, iza'o tinku'ma avesinimofona, mizama'a omne asimu eri tima

nehanatifintira Nagra ami'nugeno negahie.
⁷ Iza'o ha'ma agateresimo'a ama anazantamina erisanti haresige'na Nagra agri Anumza mani'nena, agra Nagri mofavre manigahie.
⁸ Hagi koro vahe'ene, zamentinti nosnaza vahe'ene, hi'manage zamavu'zmavama nehaza vahe'ene, vahe'ma zamahe nefriza vahe'ene, monko avu'avazamofonku'ma antahintahifima nentahiza, monko'zama nehaza vahe'ene, avuatga ha' nehaza vahe'ene, havi anumzante mono hunentaza vahe'ene krunage nehaza vahe'mo'za, mizama erisazana, havere tevava nehia teve tirupi manigahaze. E'i nampa 2 fri'zane.

Kasefa Jerusalemi kumamofa naneke

⁹ Hagi anantera 7ni'a ankerompinti mago'mo Anumzamofa tusi'a rimpahe vagare knazana 7ni'a zuompafi avite'nea eri'nenano anage huno nasami'ne, Ege'na Sipisipi anentama erisia ara kaveri haneno huno hu'ne. ¹⁰ Hagi Ruotge Avamumo'a nagrite hanavetino egeno, ankeri vahe'mo navareno tusi'a agonafi ome nante'ne. Jerusalema ruotge hu'nea mona kuma'mo Anumzamofontegati atreno erami'ne. ¹¹ Anumzamofona tusi'a masamo ana kumara remsa higeno konariri'amo'a, zago'amo marerisa havegna higeno, klasifi kenkro huno negea Jaspas havegna hu'ne. ¹² Ana kuma'mofona tusi'a zaza kegina megeno, 12fu'a kafa megeno, ana kafantamintera magoke magoke ankeri vahe'mo'za otitere hu'nazageno, 12fu'a Israeli naga'nofimofa zamagi'a ana kafantamintera krente'naze. ¹³ Ana kuma'mofona 3'a kafa,

zage hanati kaziga megeno, zage fre kaziga 3'a kafa megeno, ruga raga asoparega 3'a kafa metere hu'ne. ¹⁴ Ana rankumamofu keginama hu'neana, 12fu'a havenu trara anteteno, ana haveramimofu agofetu regrino kegina hu'ne. Ana 12fu'a haveramintera, Sipisipi anentamofu 12fu'a aposol naga'mokizmi zamagi metere hu'ne. ¹⁵ Ana ankeromo'ma naganema keagama himo'a, golire tro hunte'naza azota anteno ke'za (mesarim) eri'neni, ana ranku'ma ene, kafantamine ana keginane anteno kenaku eri'ne. ¹⁶ Ana rankuma'ma tro'ma hu'neana, ana miko asopa'amo'a magozahu higeno, zaza'amo ene atupa'amo'a magozahu huno ra higeno, ana rankumara golire'ma tro'ma hu'nea azotareti anteno (mesarim) huno kegeno, za'za'amo'a 2, 200 kilomita higeno, mareri'amofu za'za'ane atupa'ane, asopa'amo'a magozahu hu'ne. ¹⁷ Ana nehuno rankuma'mofu keginama anteno (mesarim) huno kegeno'a, tapa'amo'a 144 kiubits (66 mitagna) higeno, anama eri'neni anteno ke'nea azota vahe'mo'zama ante'za negaza (mesarim) azotareti, ana ankeromo'a anteno ke'ne. ¹⁸ Ana keginama hu'neana, Jaspae nehia havereti tro nehuno, ana rankumara goliretike trora hu'negeno, kenkro huno'ma negea klasigna hu'ne. ¹⁹ Ana rankuma'mofu kegina tra'ama avasesema hunte'neana, marerisa haveraminteti tro hu'ne. Nampa 1nia jaspae nehia havereti tra'a tro nehuno, nampa 2a safie nehia havereti tro nehuno, nampa 3a agetie nehie havereti tro nehuno, nampa 4a emelelie nehia havereti tro nehuno, ²⁰ nampa 5fu'a

sadoniksie nehia havereti tro nehuno, nampa 6si'a saldiusie nehaza havereti tro nehuno, nampa 7nia krisolaetie nehaza havereti tro nehuno, nampa 8tia berlelie nehaza havereti tro nehuno, nampa 9nia topasie nehaza havereti tro nehuno, nampa 10nia krisoprasie nehaza havereti tro nehuno, nampa 11nia jasintie nehaza havereti tro nehuno, nampa 12fu'a ametistie nehaza havereti tro hu'ne. ²¹ Hanki 12fu'a kafana perie nehaza zanteti mago mago kafana hagentetere hu'naze. Ana rankumamofo kana goliretike tro huntogeno, masa huno kenkro hu klasigna hu'ne. ²² Ana rankumapina mago ra mono nona nagra onketfa hu'noe. Na'ankure Hanavenentake Ra Anumzamo'ene, Sipisipi anentamo'ene zanagrake ana rankumofo mono nona mani'na'e. ²³ Hanki ana rankumamofona zagemo ene ikamo'enena remsa huontene. Na'ankure Anumzamomofo msamo remsa nehigeno, Sipisipi anentamo'a ana kumamofo lamu tavikna huno remsa hu'ne. ²⁴ Maka kumate vahe'mo'za ana masare vano nehanageno, mopafi kini vahe'mo'za, ra zamagima e'neriza fenoza zmia eri'za ana kumapi ufregahaze. ²⁵ Ana kumapina hanina onkina masa zamoke mevava hina, kafantamina eriogi'za anagintesageno mevava hugahie. ²⁶ Ana hanageno maka kumapi vahe'mo'za, ra zamagima nezamiza zane feno zazmia eri'za ana kumapina ufregahaze. ²⁷ Hagi pehena zane, havi anumzante mono hunente'za, havigema nehaza vahe'mo'za, ana kumapina uofretfa hugahaze. Hianagi Sipisipi anentamofo asimu eri avontafe'afima, zamagima

me'nenimo'zage ana kumapina ufregahaze.

22

Asimu eri tine, asimu eri zafamofo naneke

¹ Anantera ankeromo'a mago rantina avu sese huno klasigna hu'nea asimu eri tina naveri hige'na kogeno, Anumzamofone Sipisipi anentamofo kini trapinti hanatino ne-eno, ² ana rankuma'mofo amu'nompi nevigeno, ana timofo ruga raga ankenarega asimu eri zafa me'neni, mago'mago ikantera raga rentetere nehie. E'i 12fu'a zupa raga renente. Ana zafamofo asi'namo'a, mika kumate vahera zamazeri knamaregahie. ³ Ana kumapina magore huno zamazeri havizama hu'zana omnena, Anumzamofone, Sipisipi anentamofo kini tramoke'za me'nena, kazokzo eri'za vahe'amo'za monora huntegahaze. (Jen-Agf 3:14-19) ⁴ Ana vahe'mo'za Agri avugosa negenageno, Agri agimo'a kokovi zamire megahie. ⁵ Hanki ana kumapina hanima hu'zana omnetfa hanigeno, lamumofo msane, zagemofo masagura ontahitfa hugahaze. Na'ankure Ra Anumzamo Agra'a tavi masa'a, ana kuma'mofona manino remsa huzmantenige'za, zamagra kva vahe mani'vava hugahaze.

Jisasi'ma esiazamofo naneke

⁶ Hanki anante ana ankeromo anage huno nasmi'ne, Ama nanekemo'a tamage hu'neankino maka vahe'mo'za zamentinti hugahaze. Kasnampa vahe'mokizmi avamuzmimofona, Ra Anumzamo ankeroma'a huntogeno, Agri

kazokazo eri'za vahera makazama ame huno efore'ma haniaza eme zamaveri hu'ne. ⁷ Hanki antahiho, Nagra ko egahue, iza'o ama avontafepima me'nea kasnampa kema antahino amage antesimo'a, muse hugahie.

⁸ Nagra Joni'na ana maka'zana nentahina avanagnaza kenomo'na, ana zama nege'na nentahi'nama hute'na, naveri'ma hia ankeromofogafi, narena re'na mono hunte'naku hu'noe. ⁹ Hianagi ana ankeromo'a anage huno nasami'ne, E'inhura osuo, Negrane kagranena magozahu huta Anumzamofogafi eri'za vahe mani'nenoe. Kasnampa negafuzane, ama avontafepima me'nea nanekema nentahi'za amage'ma nentaza vahe'enena eri'za vaheke mani'none. Hanki Anumzamofonke monora hunto huno hu'ne.

¹⁰ Hanki anantera anage huno nasami'ne, Ama avontafepi me'nea kasnampa nanekea refiraoto, na'ankure knamo'a hago kofta nehie. ¹¹ Hagi iza'o havi avu'avazama nehimofona atregeno havi avu'ava zana huno vino, iza'o pehena avu'avazama nehanimofona, atregeno pehena avu'avaza huno vino, iza'o fatgo avu'avazama nehanimofona, atregeno fatgo avu'avaza huno vino, iza'o ruotgema hunenimo'a, atregeno mani ruotge huno vino.

¹² Higeno Jisasi'a anage hu'ne, Antahiho, Nagra ame hu'na mizana eri'nena egahuankina, maka vahe'mo'zama nehanaza zamavu'zavate mizana eme zamigahue. ¹³ Nagra'a esera manina (Alfa) vagare mani'noe. (Omega), Negrani'a agafahu mani'na, vagarera mani'noe.

¹⁴ Kukenazmima sesema hanamo'za muse hiho, anama hanageno'a hu izo huzmantenke'za, asimu eri zafa raga nene'za Anumzamofu rankuma'mofo kafantetira ufregahaze. ¹⁵ Hagi avuatga ha' nehaza vahe'mo'zane monko'za nehaza vahe'mo'zane vahe zamahe nefriza vahe'mo'zane, havi anumzante mono hunentaza vahe'mo'zane, krunage huzanku zamave'nesiza, krunage nehaza vahe'mo'zane, kragna vahe'mo'za ana kumapi ovu'za fegi'a manigahaze.

¹⁶ **Nagra'a Jisasina ama anazana ankeroniamo huama huno, mono kevumota tamasamihogu hunte'noe. Nagra'a Deviti naga nofi'mofo agafa mani'na, Nagrani'a nanterama remsama nehia ofuna mani'noe.**

¹⁷ Hagi Avamu'ene, Sipisipi anentate'ma vema erinaku'ma nehamokea eno nehakeno, ama nanekema nentahisimo'enena, eno nehina, tinku'ma avenesinimo'a eno hina, mizama'a omne asimu eri tinku'ma ave'nesinimo'a, amane emerino.

¹⁸ Ama avontafepi me'nea kasnampa naneke nentahiza vaheku nagra huama nehue, iza'o mago'a omnenehia kasnampa kema avrentesimofona, ama avontafepima knazanku'ma krente'nea ke'mo'a, agrite efore hugahie. ¹⁹ Hagi mago vahe'mo'ma ama kema avontafepi me'nea eri atresimofona, Anumzamo'ma asimuma eri zafa rgaguma negahie huno hu'neana oneno, Ruotge hu'nea rankumaku'ma ama avontafepi krente'nea kumapina uofregahie.

²⁰ Amama ana naneke huama'ma nehimo'a huno, **Izo Nagra ko ame hu'na egahue.** Tamage.

Ramoka Jisasiga eno.

²¹ Ranti Jisasi asunku'zamo'a maka'motma tam-
agrane mesie. Tamage.

Anumzamofu Ruotage Avontafere
The Holy Bible in the Kamano-Kafe language of Papua
New Guinea
Buk Baibel long tokples Kamano-Kafe long Niugini

copyright © 2022 Tyndale Bible Translators

© Tyndale Bible Translators

Language: Kamano-Kafe (Kamano)

Translation by: Tyndale Bible Translators

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2023-02-08

PDF generated using Haiola and XeLaTeX on 21 Feb 2024 from source files dated 13 Dec 2023

f1057ba4-e8d1-53e3-baf9-315ebf4a8836